


PROGRAMA 2017 - 2021

UNION PATRIOTICO PROGRESISTA



ELECCION 2017 | ARUBA

www.PPA-UPP.com



“Nos no por pretende pa cosnan cambia, si semper nos mes ta actua na mesun manera” — Albert Einstein

PROYECTO NOS PATRIA – PA UN MIHOR MAÑAN



Proyecto Nos Patria



Website: www.PPA-UPP.com – Facebook: www.facebook.com/UPPAruba - E-mail: upp.unista@gmail.com

Youtube: UPP Union Patriotico Progresista

Proyecto Nos Patria

Introduccion General	1
Nos Compromiso	5
Good Governance.....	9
Finanzas Publico.....	14
Desaroyo Economico	18
Pariba di Brug – Un Atencion Special	21
Turismo.....	23
Proteccion Laboral	25
Maneho di Admision.....	29
Integracion	31
Educacion	32
Cultura.....	38
Deporte.....	40
Nos Medio Ambiente y Desaroyo Duradero	41
Famia y Hubentud	43
Nos Grandinan.....	44
Husticia y Seguridad.....	44
Salubridad Publico	47
Transporte Publico	49

Introduccion General

Cu e documento aki, yama “Proyecto Nos Patria”, UPP kier comparti cu bo nos ideanan. Nos meta ta pa informa bo di nos intencionnan y cu e documento aki sirbi tambe na momento cu UPP wordo yama pa carga responsabilidad gubernamental. Nos intencion no ta pa gana bo voto pa medio di promesanan bunita, inalcanzabel y populista, ni tampoco cu yen di sensacionalismo electoral, manera show- fiestanan grandi y materialnan di campaña costoso.

Nos intencion ta simpel! Esta di INFORMA bo y EDUCA bo riba e situacion cu Aruba ta den y e cambianan cu nos kier trece, di manera cu bo por haci BO ESCOGENCIA den un forma balansa y liber y cu Aruba na prome luga.

E programa cu nos ta presenta aki, ta un producto cu a bin ta desaroya su mes desde 2012, a base di pensamentonan di integrante- y miembronan di UPP, hunto cu contribucion di diferente profesionalnan riba diferente tereno, manera expertonan den enseñanza, sociologonan, huristanan, experto riba tereno financiero-economico, turismo, labor y medio ambiental. Tambe ta trata aki di diferente idea- y pensamentonan cu nos a capta for di nos comunidad en general, tanto di sector publico como general, mescos tambe di inviduonan cu ta hopi preocupa cu e rumbo cu nos pais a bin ta pasando aden desde 2010 bin ariba. En parti e programa aki ta uno cu UPP a bay eleccion na 2013 cu ne. Un programa pa eleccion cu sigur tabata uno bon balansa y cu solucionnan concreto, pero cu lastimamente no a haya e sosten for di electorado.

Awe casi 4 año despues, nos por bisa cu ainda Aruba ta travesando den momentonan hopi dificil, apesar cu kier pone nos pueblo kere cu nos tin adelanto y desaroyo. Pesey hopi di puntonan presenta na 2013, nos ta kere cu keto bay ta vigente pa e periodo nos dilanti. Sigur na unda ta necesario UPP a adapta e programa y a amplia cu otro puntonan debi na e cambianan di circunstancia cu a presenta nan mes.

Nos ta bisa tambe, cu apesar ta trata aki di un programa extenso di loke UPP ta para p'e, toch nos tin cu apunta cu kizas no ta tur aspecto ni asuntonan a wordo acapara den e programa aki, pero cu UPP na tur momento si esaki resulta urgente y necesario, lo sa di atende esaki y duna su punto di bista riba dje.

Sinti bo mes liber pa tuma contacto cu nos partido na e-mail upp.unista@gmail.com, sea pa duna comentario, haci cualkier pregunta of sugerencia riba nos programa. Nos kier tende di bo. Sea asina bon y liber pa traspasa e documento aki na otroan, sea den forma digital of material.

Nos Motivacion

Union Patriótico Progresista a wordo lanta den bista di e rumbo cu nos pais a tuma desde 2010 padilanti. Un pais cu poco poco a bay ta perdiendo su norma- y balornan, y na unda cu anti-norman ta wordo crea cu ta afecta completamente e Arubiano y su cultura. Nos ta sinti cu e Arubiano ta wordo comberti den un obheto, cu no ta wordo permiti pa pensa, ni opina. Na momento cu esaki sosode toch, ta trata na humiya y di kibra su ser como persona, loke awendia ta wordo denota como masacre/tortura emocional of mental, cu ta wordo considera mas pio cu esun fisico.

Nos a bin ta mira pues un ambiente di represion y di intimidacion pa cu esnan cu ta pensa otro. Un cultura di miedo cu ta stroba e libertad di expresion. Asina parce cu e generacion aki no ta tuma posicion y ta laga pasa loke ta pasando. Nos por constata tambe un crisis bou nos “profesionalnan”, nos “intelectualnan” y nos instancianan gremial, cu tin problema pa sali pa nan opinion critico. Y na momento cu nan sali p'esaki nos por bisa cu ta laat.

Tambe nos por a mira un ambiente di cumplimiento di hende sea cu fabornan, empleo, of otro forma, cu intencion pa mara esakinan como votador. Sin conta tambe e desaroyo cu nos a bin ta pasa aden desde

2014 na momento cu nos pais a pasa den momentonan dificil y a hiba na perdida di e.o. nos autonomia financiero.

Mas cu un simpel programa di gobernacion, UPP kier presenta un iniciativa politico, cu mester duna tur nos hendenan, tanto Arubiano como esnan cu a scohe legalmente pa ta na Aruba, su dignidad bek, y cu ta duna e Arubiano su Aruba bek, hunto cu su norma- y balornan, mientras cu ta duna tur cu a bin yuda nos pais progresa sinti nan confortabel. UPP kier traha na un mentalidad nobo pa e pais aki por progresa na bienestar di un y tur.

Apesar cu UPP su pensamiento ta cu durante un periodo di gobernacion mester tin mas momentonan di consulta cu pueblo, por medio di p.e. un referendum, un eleccion sigurt ta un momento sagrado pa e pueblo expresa su mes. Den e caso di Aruba, UPP no ta mira e eleccion venidero solamente como un momento pa dicidi kendenan lo bai goberna nos pais, sino mas bien kico nos kier pa nos PAIS y su DEMOCRACIA. Semper nos electorado a wak e variabel “hende” den eleccion y no e otro variabel “regla”. UPP ta kere cu ta momento pa tur dos variabel wordo atendi cu ne den e eleccion aki. Aki democracia no kiermen solamente e manera con ta forma un gobierno, ken ta bay forma e gobierno, of con e sistema electoral ta hinca den otro, sino un sistema cu ta salbuardia y mehora e bienestar individual y colectivo di nos pais. Di e manera ey, haci di Aruba, e baranca cu nos grandinan a traha y lucha p'e, y cu nos kier laga pa nos yiunan, e Nacion, e Patria cu nos mes ta anhela pa tin. Di e manera aki nos por construi e Nacion, e Patria cu nos ta aspira pa tin un dia.

Puntonan di salida y Ideologia di nos partido

Libertad, democracia, husticia, durabilidad y solidaridad, ta e ideal di social-democracia. Pa UPP e idealnan aki ta hopi importante, na unda cu ta bin acerca cu e derecho riba un bida digno y decente ta central. Un existencia cu ta duna un participacion completo den e comunidad cu nos

ta biba. Creando di e manera aki un comunidad, un sociedad, unda cu libertad, solidarid y responsabilidad ta bay man den man hunto. Basa riba e ideologia social-democrata cu UPP a scohe nos partido ta enfatisa cu e ser humano ta central, e comunidad ta basa riba igualdad y libertad, sin distincion di rasa, sexo, credo, incapacidad of color politico. P'esey tambe nos ta basa nos mes riba e Declaracion Universal di Derechonan Humano, manera ancla pa Nacionnan Uni na 1948, mientras cu pa UPP tambe ta importante e stipulacion di Nacionnan Uni di 1960 den articulo 2 di resolucion 1514 cu ta reconoce e derecho di autodeterminacion di pueblonan y na unda cu e pueblonan tin e derecho di determina nan status politico y busca su desaroyo economico, social y cultural propio.

Pa UPP e pensamentonan aki ta, cu e libertad di pensa y actua di cada ser humano ta importante, ya cu esaki ta determina su desaroyo y felicidad. Hunto cu esaki ta importante tambe e sentido di convivencia entre ciudadanonan di un pais y di resto di mundo, cu respet pa e cultura di e nacion.

E convivencia aki ta forma e base pa un sociedad husto y sigur pa un y tur, pa presente y futuro, unda nos por biba manera ruman cu otro.

Eleccion 2017: buskeda di union

Despues di eleccion 2013 partido UPP na varios ocasion a trata na yega na un frente nacional cu diferente partido, particularmente esnan den oposicion, pa di modo ey nos enfrenta e desaroyo cu nos a pasa aden desde 2014. Esey ta e momento cu e gobierno actual a demostra con entreguista nan por ta djis pa keda den posicion y pa cumpli cu deseonan di gobierno Hulandes. A causa di e entreguismo aki nos a bin ta perde partinan di nos autonomia, cu tanto pueblo di Aruba a lucha pe.

Asina partido UPP a presenta su *Compromiso Nacional* pa por bira e base pa nos por a muestra un union aki na Aruba pa cu Hulanda.

Lamentablemente e tempo ey no tabata tin e boluntad pa tal accion y asina un intento noble no por a haya forma.

Awe dilanti di eleccion, partido UPP a muestra y a purba pa bini cu un union bou partidonan di oposicion cu sea a participa caba na e ultimo eleccion y no a haya asiento, of cu ta nobo. Despues di varios intento, partido UPP a logra, hunto cu partido PPA, Partido Patriotico di Aruba, pa forma un lista combina, pa eleccion 2017. Di e forma aki nos por ofrece un alternativa pa nos electorado y asina evita cu ta bini atrobe un gobierno di mayoria absoluto. Den e combinacion aki nos rol ta uno di ta dispuesto pa tuma retonan cu nos pais ta confrontando y na mes momento tuma e rol di ta un partido cu ta controla gobernacion y garantisa asina tambe bon gobernacion.

Vision di nos partido

UPP ta kere den un comunidad cu ta brinda tur nos ciudadanonan e oportunidad pa desaroya su mes y contribui na su comunidad. UPP ta kere cu fortaleza di nos nacion ta den nos hendenan. Nos ta kere den un comunidad cu ta carga su responsabilidad, cu ta tuma e timon di su propio desaroyo, cuidando su cultura, norma- y balornan, mescos cu su medio ambiente. Un comunidad basa riba solidarismo y participacion activo di nos ciudadania.

Pa por yega na un comunidad asina ta importante pa:

- Stimula union y solidarismo bou nos ciudadanonan, cualkier sea nan origen y cultura, pa medio di un integracion real, cu nos cultura, tradicion, Papiamentu, norma- y balornan como forsa catalisador, pero cu respet pa cultura di otronan;
- Conserva principionan humano cu ta permiti nos biba manera ruman, buscando ideanan nobo y innovativo pa nos por enfrenta y surpasa retonan nos dilanti, pa alcanza e progreso y prosperidad desea pa nos pueblo;
- Sostene democratisacion di e comunidad y e sistema politico, protegiendo e fundeshi democratico y e estado di derecho, door di promove transparencia, bon gobernacion, interes y consenshi politico, pa medio di mehoracion, renovacion y reformacion di nos sistema di gobernacion, na unda e ciudadano critico ta sintie

- involvi, proveyendo asina un sociedad democratico y duradero, na unda cu no tin lugar pa e cultura di miedo;
- Gobierno ta percura pa tur servicio basico pa nos pueblo, y cu tur loke cu ta cai bou utilidad mester ta den man di e pueblo, como patrimonio di pueblo.
 - Tur ciudadano Arubiano, incluyendo esnan cu a bin di exterior y cu ta legalmente na Aruba, tin garantia riba husticia social, bienestar general, proteccion igual di ley y sentido di seguridad, tanto di propiedad como di culpa;
 - Tur ciudadano tin derecho y acceso y oportunidad igual di trabou, mescos cu un entrada husto, garantizando trabou pa e trahadonan local prome, hibando un maneho di admision balansa pa proteccion di nos forza laboral;
 - E crecimiento di poblacion pa medio di inmigracion mester ta uno responsabel, basa riba un maneho unda ta tene cuenta cu e espacio cu tin y provisionnan general pa futuro, manera enseñanza, pension, servicio social, seguro medico, tereno, vivienda y cu e respet pa e naturaleza, pa asina garantiza e necesidadnan basico cu tur ciudadano por dispone di dje pa por tin un bienestar aceptabel pa su mes y su famia;
 - Enseñanza ta un di e derechonan mas fundamental di un hende y p'ese y e mester ta un enseñanza di INCLUSION y no di exclusion, y cu ta forma e ciudadano y ta duna e ciudadano e oportunidad pa desaroya su capacidadnan optimalmente, na bienestar di su mes, su famia y su pais;
 - Stimula un desaroyo duradero cu respet pa naturaleza;
 - Respeta y stimula iniciativanan particular cu ta contribui na e crecimiento economico, social y spiritual di nos pueblo, y cu mester desemboca den e prosperidad y bienestar pa nos pueblo, dunando asina pues na e inversionista, tanto local como stranhero, e espacio pa haci ganashi, pero poniendo nos hendenan y nos mama tera central (People, Planet & Profit);

- Defende y engrandece Aruba su autonomia, manera logra bou guia di sr. Betico Croes d.f.m. na e Conferencia di Mesa Rondo na 1983, como un logro importante y determinante den emancipacion politico y estatal di nos pueblo, cu ta duna nos e espacio pa un desaroyo economico, cultural y social propio, segun art. 1514 di Nacionnan Uni, y basando e relacion den Reino, e cooperacion regional y internacional riba respet mutuo.

Nificacion di number y logo di partido

“Union” ta e ingrediente necesario pa realiza cosnan grandi pa e pais aki. E ta nifica tanto trece tur hende hunto di cualquier origen y pensamiento, pa asina duna un aporte na nos pais, como tambe unificacion di pueblo pa un causa comun, mescos tambe sectornan di nos comunidad cu ta dispuesto pa traha hunto na bienestar di nos pais.

“Patriotismo” ta e pensamiento cu ta vincula un hende cu su patria. Ta e sentimiento cu un hende tin pa e tera natal di dje of cu e ta adopta pa biba riba dje y cu e ta sinti'e liga na su balornan, cultura, historia y sentimiento. “Progresista” ta accentua e pensamiento y doctrina cu ta sali na defensa di e hende y sociedad pa adelanto y cu ta busca desaroyo di esakinan den e aspecto economico, social, científico/educacional y cultural, meramente na bienestar y progreso pa tur.

Den e logo, e shoco ta refleha seriedad, sabiduria, fortaleza, curashi y determinacion. E shoco ta conoci pa ta un protector, semper alerta y na defensa di su neishi, esta “Aruba”. E shoco ta un parha crioyo menasa y cu mester wordo protehi, mescos cu Aruba tambe ta wordo menasa.

E colornan rond di e wowo ta refleha e diversidad di nos nacion unda hende di tur color y pensamiento ta biba, mescos tambe e ta un refleho colorido di nos cultura y procedencia, e origin Indjan y Caribense.



Mientras cu e wowo ta duna muestra di un partido cu determinacion, cu vision y curashi. E color cu UPP ta identifica su mes, ta e color blauw.

E flecha den e direccion ariba ta simbolisa e liña di progreso cu UPP ta desea pa e nacion aki.

Nos compromiso electoral

Periodo di campaña semper ta conoci como un periodo di temperamento halto, haci promesanan, gastamento di placa na grandi, cumplimiento di voto y simpatia, y di kibra otro no a base di punto di bista ni di idea y ni di programa, sino di kibra otro personalmente, loke ta wordo yama asesinato di caracter.

UPP kier un campaña politico basa riba honestidad y respet, riba contenido, argumentacion y transparencia. Meta di UPP den campaña ta mas dirigi riba duna informacion y educa nos pueblo votado riba nos situacion actual, y bende nos ideanan na nos ciudadanonan. Ideanan cu mester crea speranza riba un miho Aruba di berdad.

Nos partido ta propone pa mantene su mes na e siguiente codigo di conducta:

- Tur candidato riba lista di UPP y su siguidornan ta respeta nan mes y lo trata tur otro hende, tanto candidato como simpatisantenan di otro partidonan, cu respet;
- Den campaña pa UPP y su candidatonan, no tin espacio pa haci promesa falso, ni di accionnan cu ta zona popular pero cu no ta na beneficio di bienestar general; tur candidato ta consciente cu votamento ta un derecho sagrado di cada ciudadano y cu p'esey no por cumpra of purba na cumpra voto di hende;
- Tur candidato di UPP ta respeta material di campaña di otro partido;
- Partido UPP lo hiba su campaña conforme nos leynan y lo ta transparente cu su financiamiento di campaña;

- Tur candidato y miembro di partido UPP ta comprometi, cu na momento di ocupa un puesto publico sea den Parlamento of na nivel di gobierno of cualquier otro cargo publico, lo mester entrega un declaracion di propiedad y bienes, mescos tambe di debe na directiva di partido y na Controlaria General tanto na comienso como na terminacion di su periodo di representacion. Esaki en bista di futuro cambionan den nos sistema di gobernacion, cu UPP ta propagando.



Nos Compromiso

PLAN PROGRESO PA NOS PATRIA, NA CAMINDA PA CAMBIO DI MENTALIDAD

Pa e periodo di gobernacion 2017 – 2021 partido UPP ta presenta aki su compromiso cu pueblo di Aruba, ofreciendo un plan pa progreso di nos patria, na unda lo cuminsa pone e prome piedranan pa e cambionan fundamental di mentalidad, actitud y compromiso. UPP ta considera e eleccion venidero como e ultimo oportunidad pa nos recobra nos Aruba, pa duna e ser humano su dignidad y garantiza democracia berdadero y transparencia den gobernacion. Nos mester ta consciente cu, manera Albert Einstein ta bisa: "Nos no por pretende cu nos lo cambia, si semper nos ta actua di mesun manera."

P'esey pa UPP ta importante pa pone como cuadro algun liña di pensamiento cu mester sirbi como puntonan di salida pa e programa, pa e

plan di accion cu nos ta presenta aki pa e siguiente gobernacion di Pais Aruba.

Puntonan di salida importante

1. Tur pueblo tin e derecho di autodeterminacion, unda e ta determina libremente su condicion politico, y ta busca su mesun desaroyo economico, social y cultural. P'esey pa su maneho, UPP ta tene na cuenta tratadonan cu Aruba a ratifica, particularmente esun di derecho di autodeterminacion. Progreso, desaroyo y cooperacion, ta crucial pa pueblo di Aruba por sigui bai dilanti y ta un proceso cu mester di hopi tempo y espacio pa gobierno y pueblo por actua.
2. Tambe riba nivel regional, di Reino y internacional, UPP ta kere den cooperacion, y ta duna su frutonan na tur esnan involvi na un manera husto. Ta importante tene cuenta cu e situacion internacional den e periodo nos dilanti, ya cu e ta bai sigui tin su efecto riba nos comunidad y riba gobierno. Por menciona prijs di petroleo, cu apesar ta muestra stabiel na e momentonan, lo keda fluctua. Otro topico ta e problematica di suministro di cuminda, cu ta afecta specialmente esnan cu no tin e recursonan suficiente pa por cumpra esaki. Hunto cu esaki por menciona tambe decadencia di nos sistema ecologico cu tin su impactonan na prome instante riba teritorionan isleño y costeño. Otro fenomeno ta e importacion di inflacion, causa hustamente pa e situacionnan aki riba menciona. Tambe di vital importancia ta e situacion economico y social permanente cu nos pais bisiña ta biba aden y cu ta un fuente di inestabilidad, tambe pa nos, mirando su cercania. Mientras cu na nivel di Reino, particularmente den nos relacion cu Hulanda y e percepcion di e pueblo Hulandes pa cu nos, tambe lo tin su retonan.
3. UPP ta ratifica cu gobierno mester actua dentro di un cuadro legal y dentro di entre otro principionan di bon gobernacion. Esaki ta conta pa parlamentario-, minister- y empleadonan publico. Tur

gobierno eficiente ta ehecuta e cuadro legal y ta controla ehecucion di esaki, pa garantiza cu e "Checks and Balances" ta funciona. Esaki ta conta tambe pa instancianan semi-gubernamental (nv-nan, fundacionnan, companianan sui generis, etc.).

Pa un miho proceso entre minister- y empleadonan publico, gobierno ta bin cu un maneho di "Integridad". Tur instancia ta ehecuta e cuadro legal aki sin ningun intervencion. Den caso di conflicto, e solucion cu leyman ta brinda, ta un corte imparcial.

4. E crisis economico mundial y tambe local cu nos a pasa aden e ultimo añanan, a contribui pa un parti na crisis di financiamiento di nos administracion publico. Pero e situacion di nos finanzas publico a empeora mas aun pa motibo di mal gobernacion, nepotismo, populismo, falta di control efectivo riba nos administracion publico, esta gobierno.

Pa e motibo aki, ta mas cu obvio cu ta importante pa consolida nos presupuesto nacional den un forma balansa y haci recorte di gastonan publico cu por wordo considera innecesario. UPP ta considera cu tur momento di crisis ta tambe uno di oportunidad di revision di e practicanan cu a desaroya durante tempo y di introduccion di mehoracion di e practicanan aki, of di bin cu un dimension nobo. E contenimento of reduccion di gasto no mester perhudica e calidad di bida di e ciudadano, ni e calidad di servicionan publico. Pues dos elemento fundamental pa profundisa. Austeridad den gasto, pa tur loke ta trata gastonan cu no ta afecta e servicionan publico cu gobierno ta duna, y eficiencia di maneho, dirigi particularmente riba e forma di actuacion y prestacion di servicionan compartiendo e costonan na unda cu esaki ta posibel y necesario; di e manera aki por saca e miho probecho pa e comunidad.

5. UPP ta traha riba Arubianisacion pa medio di proyecto riba nivel nacional. Esaki lo encera entre otro: norma- y balornan; cultura y folklore, nos idioma Papiamentu. UPP ta percura pa e

- proyectonan aki ta wordo ehecuta pa: famianan; scolnan; instancianan relevante y medionan di comunicacion. Lo pone atencion special na anti-normanen cu poco poco a bira norma. Orguyo di nos pueblo ta su identidad. Hunto cu esaki, UPP ta bin cu un proyecto riba nivel nacional di “Bon Ciudadania”. Tur ciudadano di Aruba ta traha pa Aruba y ta pone e isla aki na prome luga.
6. Ta importante tambe garantiza e derecho politico di nos ciudadanonan, unda no tin espacio pa e cultura di miedo, mientras cu transparencia y un sistema democratico renoba y reforma, ta garantiza un democracia bibo pa un y tur. Hunto cu esaki lo implementa e sistema di “Dialogo Nacional” den un forma institucionalisa, unda cu tur sector di nos comunidad ta representa.
 7. Pa medio di un Plan Socio-Economico responsabel pa teritorio di Aruba, UPP ta minimaliza migracion na esnan mas urgente, y ta percura pa mas tanto posibel, nos Arubianonan tin trabou. Esnan cu pa motibo di edad no por haya trabou, ta negocia cu dunado di trabou pa nan acepta e trahadonan y ta capacita esnan cu falta capacidad, pa medio di programanan relevante.
 8. UPP ta establece pa ley, cu tur otro gobierno cu bini, ta presenta su plan Socio-Economico mara na un presupuesto pa haci menos debe posibel, esaki pa evita cu ta condiciona nos autonomia. Ta traha segun cifranan relevante riba prioridadnan real. Den e plan Socio-Economico aki, lo stimula nos hendenan pa tuma iniciativa pa nan bin cu nan propio negoshinan.
 9. UPP ta consciente cu salario di un trahado, ta determina su bienestar, p’ese y “salario husto” ta bira un topico di discusion. Un salario real mester por cumpli cu e gastonan di cada hogar. Desaroyo economico ta trece beneficio pa un y tur, y tur mester haya nan parti. Salarionan minimo lo mester ta mara segun categoria.
 10. UPP lo traha riba re-alocacion di fondo y ta uza esaki pa yuda mas ciudadano cu ta posibel. E proyecto ta beneficia diferente otro tereno. Un ehempel ta un proyecto di transporte.
 11. UPP ta atende tur gruponan segun urgencia di cierto necesidad, sinembargo lo pone mas atencion riba maneho integral nacional di famia y nos hobennan cu ta e pilar di futuro di Aruba. Pa garantiza e servicionan, UPP lo revisa e estructura di solidaridad (pensionnan y salud) y nos estructura di ayudo social financiero. UPP ta traha riba desaroyo integral di nos hendenan.
 12. Tambe e situacion di nos seguridad tanto riba nivel personal y fisico como riba propiedad, mester haya e atencion necesario, ya cu e ciudadano tin e derecho di sinti su mes sigur. Esaki tambe ta conta pa e parti di salud, unda no unicamente lo mester tin atencion pa e parti curativo, sino lo enfoca mas riba e parti preventivo.
 13. Educacion riba tur nivel, lo ta na beneficio di tur nos mucha- y studiantenan. Especialmente nos muchanan di habla Papiamentu lo haya atencion necesario. Lo fortifica Papiamentu na un forma responsabel na scol, pasobra e dominio cu bo tin di bo idioma materno ta determina bo capacidad pa sigui siña otro idioma. Riba un pais manera Aruba, maneho di idioma ta indispensable. Lo bin cu un campaña pa evita cu e muchanan ta bandona scol. Nos famia y muchanan lo mester mira e beneficijan di educacion.
 14. UPP ta considera cu servicionan mester yega na e ciudadanonan cu mester di esakinan. Atencion pa muchanan despues di scol ta bira importante. Atendiendo entre otro educacion, famia, nos hobennan ya caba ta minimalisa criminalidad, di un manera sostenibel. Sinembargo ta necesario pa bin cu proyectonan pa coregi unda cu por actitud di presonan.
 15. UPP ta kere cu tur nos grandinan tin e derecho di tin un bon cuido y tin un bida digno y di calidad mei mei di nos comunidad, mientras cu nos muchanan y hubentud lo mester haya e atencion

necesario pa por lanta den un ambiente sano y sigur, di acuerdo cu e derecho internacional di mucha.

16. Pa medio di proyectonan riba nivel nacional y instancianan gubernamental y di grupo, UPP lo ehecuta su Plan.

“Nos Patria no ta un dicho. E ta e consenshi di nos tur!”



“Loke ta necesario pa un pais bay perdi, ta cu e pueblo ta keda keto man crusa!”

Proyecto Nos Patria:

**Good Governance*

** Enseñanza*

** Seguridad*

** Medio-ambiente*

** Integracion*

** Aruba Ta Nos Tur!*

Good Governance

NOS DEMOCRACIA Y ESTADO DI DERECHO TA NA PELIGER

Saliendo for di e declaracion di Nacionnan Uni di derechonan politico di ciudadanonan, UPP ta considera como puntonan importante nos democracia y nos estado di derecho, cu no conoce su miho momentonan. Tumamento di decision na Aruba ta bay cu yen di manipulacion, sin e transparencia necesario y hopi biaha yen di intimidacion, fomentando asina e “cultura di miedo”.

Democracia no ta unicamente e forma di gobierno of e sistema electoral. Pero e ta e sistema cu ta salbanguardia y mehora e bienestar individual y colectivo, unda cu cada ciudadano ta sinti cu e ta forma parti di un comunidad, cu e ta wordo scucha y cu e ta sinti cu e ta wordo trata igual (pues unda no tin politica di patronahe). Cada eleccion riba su mes ta hopi importante. Pero teniendo na cuenta e estado di nos democracia deficiente y un gobernacion malo, UPP tin di enfatisa cu e eleccion venidero ta uno hopi decisivo pa loke ta concerni nos pais y nos democracia.

Libertad, igualdad, integridad, respet mutuo, democracia participativo y husticia ta hopi importante. Ta importante pa sostene e creacion y mantencion di un sociedad unda e hende ta sintie involvi y ta permiti’e pa ta critico, promoviendo asina un sociedad democratico y duradero, unda cu no tin lugar pa e cultura di miedo.

UPP ta sostene e democratisacion di nos comunidad y e sistema politico, door di proteha e fundeshi democratico di Aruba y su estado di derecho. Den esaki ta esencial promocion di transparencia, bon gobernacion, interes y consciencia politico. Esaki entre otro pa medio di mehoracion y renobacion di nos sistema di gobernacion, dunamento di servicio eficiente door di instancianan gubernamental y maneho di finanzas publico responsabel.

Durante e ultimo añanan aki hopi ta e casonan cu a tuma lugar aki na Aruba, cu ta duna nos pueblo e sentimiento, cu trato igual no ta existi mas. Nos por mira negoshi di tereno di pueblo cu ta tuma lugar, concentra rond di algun persona privilegia, mientras cu e pueblo den necesidad no por haya un pida tereno. Tambe nos por mira e negoshi di permiso y “ontheffing”-nan cu a bin ta tumando lugar, cu den un comunidad y un estado drechi no por mira luz di dia, a para algo comun.

En bes cu esnan cu ta comete e faltanan ta wordo atendi cu nan manera tur otro, ta crea legislacion pa hustamente scapa p.e. un minister. Nos por a mira cu tratamiento di presupuesto y recientemente na momento cu un minister a bira sospechoso, Parlamento di Aruba ta introduci un ley cu hustamente por acomoda e minister cu a comete e fayto. Esaki na su turno creando un discrepancia grandi den nos sistema legal y no ta contribui na e esencia di igualdad cu mester existi, manera nos constitucion den articulo 1 hustamente ta para p’e.

TRANSPARENCIA: BASE DI CONFIANZA PA UN DEMOCRACIA BERDADERO

Democracia ta basa riba un compromiso entre e ciudadano y gobierno. E ciudadano mester tin e confianza cu e ta wordo bon informa riba e actividadnan di gobierno. E ciudadano tin e derecho pa participa den e democracia aki. Sinembargo e ciudadanía por participa solamente den un proceso democratico si e ta wordo informa corectamente di e actividadnan y e maneho di gobierno. Esey ta wordo logra solamente door di un transparencia total di maneho.

Tin dos sorto di transparencia di maneho: esun activo y esun pasivo. Transparencia di maneho activo kiermen cu un gobierno ta informa e ciudadanonan na un manera sistematico tocante e



maneho hiba door di gobierno. Transparencia di maneho pasivo kieren cu ciudadanonan por haci un peticion pa sea mira, haya un copia di, of ricibi informacion tocante un of mas documento existente di gobernacion. Den henter e concepto di gobernacion, UPP ta mira esaki como un proceso completo di tuma decision. Tumamento di decision unda cu ta tene cuenta cu opinion y pensamentonan, interes y ideanan di otro. Y no ta basa riba esun di un grupo di hende cu ta na poder. P'esaki por ta efectivo e comunidad y e stakeholdernan mester wordo scucha.

Ley di transparencia y informacion accesibel

P'esey lo mester fortifica e Ley di Transparencia di Maneho, ya cu esaki ainda ta permiti e minister pa ta selectivo den su informacion. UPP tin entre otro como metanan pa promove interes y conscientizacion di nos ciudadanonan den politica y di otro banda mehora servicio di departamentonan. Ta importante pa banda di informa, involvi tambe e ciudadano activamente. Asina e por evalua trabou y maneho di gobierno. Esey por solamente door di duna informacion regularmente na un manera sistematico na e ciudadanonan. P'esey ta importante pa publica informacionnan obhetivamente, un bes of mas biaha pa aña, cu e obhetivo cu e diferente manehonan por wordo evalua, manera maneho di husticia/polis, di personal, finanzas, labor, admision, salubridad, enseñanza, etc. Di e manera aki e ciudadano por evalua si e gobierno ta cumpli cu su deber, y e lo por sinti si su interes ta wordo sirbi of no! Di e manera aki UPP su intencion ta pa upgrade e conscientizacion di e ciudadano, pasobra e berdadero progreso di un nacion no ta bin door di propaganda, sino door di **informa y educa**. Den e caso di e ministro cu a duna "ontheffingen", nos por bisa cu e regla di transparencia ta ensera, cu na momento di haci esaki, e minister concerni mester publica tur e "ontheffingen" cu ela haci, basa riba cua procedura y cua ley- y reglanan. Y den esaki ta importante e hustificacion, argumentacion y motivacion di e decision tuma. Na momento cu e ciudadano sinti cu minister no ta actua corecto, e lo por tuma pasonan pa corigi of para esaki.

Den cualkier democracia ta importante pa un gobierno ta transparente, asina dunando pueblo e posibilidad di haci un escogencia consciente, y su representantenan e posibilidad di controla gobierno. Parlamentarionan mester haya e informacion necesario pa haci nan trabou, y pueblo haya informacion corecto y obhetivo. UPP kier percura pa transparencia, dunando tanto na Parlamento como na e comunidad e informacionnan corecto y habri pa asina ey nan por huzga pa nan mes e situacion real di nos pais y sinti cu nos estado di derecho ta funciona.

Obliga ministernan pa responsabilisa nan mes na Parlamento y Pueblo

Mirando cu hopi biaha ministernan no ta responsabilisa nan mes na Parlamento, lo bin cu leynan pa habri e posibilidad cu Parlamento por obliga un minister duna contesta na preguntanan di Parlamento, apesar cu UPP ta kere cu un hende cu consensi, lo no mester warda pa wordo dicta pa responsabilisa su mes. Tambe UPP lo propone un cambio di ley unda ta obliga e ministernan cu ta biaha, pa bin Parlamento prome cu e biahe pa duna splicacion kico e biahe ta encera. Tambe ora di regresa di un biahe, minister ta obliga pa bin duna cuenta. Di e manera aki Parlamento na un forma anticipa, y no via di prensa, ta wordo poni na altura di e meta di cada biahe, pa asina evita e sorpresa di protocolnan y combenionan cu ta mara nos pais, y cu Parlamento despues tin di djis guli manda bou. Introduccion di un website nobo, banda di esun existente (www.gobierno.aw) na unda lo publica informacionnan clave y decisionnan di gobierno, parti pa ministerio y e departamentonan, mientras ta duna oportunidad na e comunidad pa duna su opinion of remarcanan.

"A democracy requires accountability, and accountability requires transparency" – Barack Obama

PATRONAHE POLITICO – FRIENDS, FAMILY & MORE

Tur gobierno mester di bon ambtenaar y bon companianan pa ehecuta proyectonan y asina logra metanan pa un pais. Na bienestar di pueblo y pa garantisa un trato igual, gobierno den un forma husto y cuidadoso, ta duna e persona- y companianan mas capas e trabounan pa ehecuta. Den e forma aki pueblo por confia riba servicio adecua y proyectonan bon ehecuta. Asina placa di pueblo ta wordo usa responsablemente, pagando e persona of compania cu berdaderamente merece di por traha pa nos pais cu placa di pueblo.

Ora un gobierno no ta hiba un maneho responsabel y husto den esaki, y gobierno no duna persona- y companianan trabou a base di nan cualidad y experticio, pero pa otro motibonan, pueblo ta sali perdi. Lamentablemente mayoria Arubiano conoce un of mas persona cu a logra haya un posicion no (solamente) a base di su calidad, pero mas tanto pa ta ayega sea politicamente of personalmente na un persona cu ta den gobierno.



Tur tempo tur gobierno a wordo tilda di a haci politica di patronahe. Un mas cu otro. Esaki conoce hopi forma, sea cu dunamento di proyectonan, cu por ehempel no ta bay destaho publico, pero ta duna un famia of amigo e proyecto bou man of sea ta duna un hende trabou sin cu esaki tin e preparacion necesario pa cubri cierto puesto.

Pa UPP ta importante pa no solamente bisa cu nos no lo abusa di poder politico, pero realmente trece cambionan necesario cu lo preveni cualkier partido di por abusa di su poder politico. Ta dificil pa haci faborecimiento politico imposibel, pero esey no kiermen cu nos no tin cu haci lo maximo pa minimalisa esaki. P'esey UPP, mirando e sentimento di e pueblo aki pa

loke ta trata faborecimiento na famia y amigonan, na grupitonan, na compinchi y na privilegiadonan ta compromete su mes di elimina berdaderamente e tipo di faborecimiento aki. P'esey UPP ta propone pa bini cu e siguiente cambionan.

Ley di comptabilidad

Ley di comptabilidad lo wordo amplia pa loke ta e aspecto di destaho publico, dunando asina Gobernador un posicion di control den esaki. Tambe lo pone dicho landsbesluit y tur “onderliggende stukken” ter inzage na Parlamento pa un periodo di 7 dia, pa asina henter e proceso por bira transparente di berdad.

Nos debe nacional

Mara den nos constitucion cu e deficit annual no ta surpasa e 3% di nos Producto Bruto Nacional, pa evita cu pais y pueblo ta wordo comprometi cu gastonan, ya cu ora ta trata di compinchinan parce cu “the sky is the limit”, mientras cu nos quota di debe nacional mester keda mara na un 40 pa 45% di Producto Bruto Nacional (GDP).

Nombramento husto

Depolitisa nombramento di ambtenaar- y contractantnan pa medio di un organo independiente consistiendo di hefe di servicionan relevante (mescos den e caso di VUT), mientras ta mara den ley e organisacion gubernamental y e cantidad di puestonan pa evita creacion sin mas di departamento y yena e aparato indiscriminadamente cu compinchinan, famia- y amigonan. Di e manera aki tambe nombramentonan ta wordo conteni.

Tambe tin cu mara e grupo di sosten rond di un minister a base di ley (manera proponi pa Rapport Wever) y na un nivel realistico, y hunto cu esaki tambe e presupuesto pa e gabinete di ministernan mester ta mara na un nivel realistico cu salarionan realistico.

Financiamento di partidonan politico

Sostene introduccion di ley di financiamento di partidonan politico, pa evita cu gruponan di influencia y aheno ta esnan cu lo ta determina politica y gobernacion di nos pais. Asina lo mester bin cu areglonan cu ta contene parcialmente subsidio di parti di Gobierno na partidonan politico y e posibilidad di ricibi donacionnan pero mara na un suman y cu un registracion supervisa, transparente y publico. E ley aki tambe ta percura pa caba cu e uzo di fondonan publico pa core campaña, manera uzo di autonon di gobierno of paga dor di gobierno, "ter beschikkingstelling" di ambtenaarnan y tambe uzo di coordinadornan pa core campaña bou ora di trabou.

Ley di conducta pa campaña politico

Den e espirito di loke Comision di Bon Boluntad a purba na realiza durante diferente eleccionnan, UPP ta mira como un parti esencial creacion di Organo di Supervision di e proceso di campaña electoral, na unda cu pa medio di ley, partidonan politico y tercera, manera medionan di comunicacion y otro organisacionnan mester tene nan mes na cierto conducta y etica di campaña.

Den e ley aki tambe lo por pone e cuadro cu partidonan politico ta cumpli durante e temporada di eleccion, manera respet pa propiedad aheno pa loke ta trata material di campaña, propaganda/advertencia politico di nivel, mescos cu respet pa contrincantenan politico.

Den e areglo aki tambe lo mester regula cu tur partidonan politico ta haya igual trato y derecho p.e. pa programanan di television, radio, y debatenan cu ta wordo organisa.

Ley di declaracion di propiedad y bienes y di debe

Mescos cu nos tin den nos compromiso di partido cu tur candidato y miembro di partido UPP ta compromete, cu na momento di ocupa un puesto publico sea den Parlamento of na nivel di gobierno of cualquier otro cargo publico, lo mester entrega un declaracion di propiedad y bienes,

mescos tambe di debe na directiva di partido y na Controlaria General tanto na comienso como na terminacion di su periodo di representacion. Den bista di esaki, UPP ta mira cu esaki ta bira un requisito indispensable pa asina evita enrekisimento y faborecimiento di politiconan, particularmente ora nan bay carga un funcion publico. Di e manera aki por controla despues di un periodo di gobernacion si e politico por a enerikese di un manera ilicito su mes danki na e funcion cu e ta carga.

Bon Gobernacion!

Evita conflicto di interes ministerial

Un aspecto den e ultimo añanan sigur ta e conflicto di interes di varios di nos ministernan. Antes den e Eilandenregeling tabata tin tipo di areglonan cu tabata tin como meta pa exclui e posibilidad di conflicto di interes. Den nos constitucion no tin nada al respecto regla, loke ta conduci na situacionnan cu ta cuestionabel. P'esey UPP ta sali for di e punto di bista, cu banda di mara man di politiconan, ta necesario pa evita cu ministernan cu wordo nombra tin conflicto di interes cu nan. UPP ta boga pa hinca esaki den nos constitucion, y na unda cu, mescos ora di tin e proceso di screening, tambe un comision lo por investiga y determina e posibel conflictonan di interes cu por ta existi.

Persecucion politico

Ley pa pone minister personalmente responsabel den casonan cu ta persigui hendenan sin base, poniendo nan asina tambe personalmente responsabel pa e gastonan involvi y cu no ta gobierno, lesa pueblo, tin cu paga pa casonan descabeya, na momento cu e y su abogado mester por a

conclui cu nan lo perde e caso. Asina aki ta pone ministernan pensa dos biaha prome cu ta persigui un hende politicamente, sin base.

"Den cuadro di Bon Gobernacion, mara man di e politico ta algo inevitabel."

DEMOCRACIA BIBO

Banda di e aspectonan di transparencia y patronahe politico, ta importante pa nos sistema democratico mes wordo mehora y intensiva. Mirando e desaroyonan di e ultimo añanan den nos sistema di democracia parlamentario, nos por constata cu e sistema di mayoria absoluto, crea pa nos sistema electoral, ta causando daño na nos pais. Den e proximo



Parlamento, UPP lo opta pa trece un discusion riba nos sistema parlamentario, pa asina mehora nos democracia, un democracia berdadero, si ta necesario por medio di reformanan. Prome cu nos papia di un deficit democratico den Reino, manera a bin ta sosode pa mas di 25 aña caba, UPP ta kere cu nos tin di atende e deficit democratico na cas prome. Mester tuma pasonan concreto pa mehora nos democracia parlamentario en particular y hisa e grado di democracia berdadero.

Secuencia di number riba lista

Asina UPP lo opta pa e ley electoral conoce pa cuminsa dos cambio cu por bai yuda mehora nos democracia, esta eliminacion di e secuencia di number pa candidatonan cu ta bai riba un lista y na unda cu ta segun secuencia di voto di e candidatonan ta determina e drentamento den Parlamento.

Sistema di sosten por medio di firma na partidonan politico

UPP ta boga pa revisa e sistema di duna sosten na partidonan politico cu no alcanza asiento den eleccion. Por pensa aki den un sistema di un cantidad simbolico, of pa candidato of kizas descentralisacion di esaki den un forma cu ta garantiza tambe e privacidad di esun cu ta bin pone su firma.

Sistema di restzetel

Un otro cambio cu UPP ta kere cu mester bin ta e sistema di restzetel, na unda pa evita cu votonan di partido cu no a alcanza e "kiesdeler", ta bai perdi, esakinana tambe ta participa na e ronda di "restzetel". Esaki ta haci tambe cu e ciudadanonan cu ta sostene e partidonan aki, ta sinti cu nan votonan ta bal y ta haci e participacion civico mas grandi. E sistema aki ta evita tambe cu e restzetelnan hopi biaha ta termina cerca e partidonan mas grandi, fomentando asina gobiernonan di mayoria absoluto ficticio, pero cu realmente no ta gosa di e mayoria absoluto di voto. UPP ta pensa aki na e sistema di p.e. unda por medio di e "reststemmen", unda cu segun e votonan restante e "restzetel"-nan ta wordo reparti. Un sistema cu ta conoci den varios gemeente na Hulanda.

Mehoracion di funcionamiento di Parlamento

Un otro punto tambe cu UPP lo propaga p'e ta mehoracion di e funcionamiento di Parlamento di Aruba. UPP ta kere cu ta tempo pa kita cierto podernan, yama prerogativa, for di presidente di Parlamento. Mayoria di areglonan lo mester ta hinca den e reglamento di ordo, pa asina no tin discusion riba dje.

Ombudsman

Den e cuadro di un democracia bibo ta importante pa bin definitivamente cu un ley di "ombudsman", na unda cu e ciudadano por acudi, no unicamente pa problemanan cu e por encontra cu gobernacion, sino tambe na momento cu e ta sinti cu gobierno riba cierto asuntonan no ta practica e transparencia cu pueblo ta spera di dje. E leyman di

“administratieve rechtspraak” y di “openbaarheid van bestuur” mester wordo scrutina pa e caso aki y mehora na unda cu esaki ta necesario. Den e caso di e minister cu a duna “ontheffing”, si e no a sigui e reglanan di transparencia, of e no a cumpli cu ley- y reglanan di “ontheffing”, e ciudadano of e empleado publico, cu ta hiba conocimiento di esaki por acudi na e “ombudsman” of defensor di pueblo. Y e por bay na exigí e minister splicacion di loke el a haci of keda sin haci.

Ley di “Klokkenluiders”

Nos democracia y e “checks & balances” ta faya barbarsamente, debi na e cultura di miedo cu tin den nos comunidad. Un cultura cu a wordo alimenta pa e politica tradicional di menasa y persecucion politico. Pa hustamente yega na Good Governance, mester crea e oportunidad y instrumento den nos legislacion pa protehe esun cu ta denuncia un acto di corrupcion.

“Klokkenluiders”, “Whistleblowers”, of “Denunciantes”, ta algo basta comun caba den paisnan di occidente. Pero na Aruba hopi ta p.e. e ambtenaar, cu ta wak cierto actonan pasa, pero pa miedo di represaya nan ta keda keto y defacto nan ta bira complice. Introduccion di un Ley di “Klokkenluiders”, p’esey ta hopi importante pa introduci, ya cu esaki ta garantisa e proteccion total na e denunciante.

Dialogo Nacional

Lo institui por medio di ley un instituto di “Dialogo Nacional”, na unda cu na comienso di gobernacion ta determina kico ta e puntonan esencial cu ta puntonan di discusion. UPP ta scohe pa e modelo cu Sr. Betico Croes, d.f.m. a uza den pasado, esta e RCOA, unda cu tur gremio, incluso partidonan cu y sin representacion, ta representa. E instituto “Dialogo Nacional” no mester bira un simpel appendix di gobierno, na unda cu ta cierto gruponan, sin representacion necesario ni cuantitativo for di e comunidad, aparentemente ta “decisionmakers”. Den e cuadro aki tambe lo tin consultanan habri cu esnan directamente involvi sea na nivel di bario of na nivel di region. Den e modelo aki e rol di Parlamento di Aruba

ta wordo respeta y ta keda e organo cu na final, despues di a participa tambe den un dialogo nacional, ta fiha su posicion. Gobierno su trabou ta pa ehecuta. Manera bisa, lo structura e Dialogo Nacional via di ley, mientras cu ta mara tur decision basa riba investigacion previo, pa asina trata di un decision responsabel.

“Governance and leadership are the yin and the yang of successful organizations. If you have leadership without governance you risk tyranny, fraud and personal fiefdoms. If you have governance without leadership you risk atrophy, bureaucracy and indifference.” — Mark Goyder



Finanzas Publico

APARATO GUBERNAMENTAL Y IMPUESTO

Finanzas publico y economia

E impacto di finanzas publico riba e economia real ta multiple y complejo. Apesar di esey tin un acuerdo general riba tres punto caminda finanzas publico por contribui potencialmente na crecimiento economico y na empleo.

E prome ta e acumulacion di factornan productivo. Gobierno ta contribui directamente na crecimiento economico y na empleo pa medio di e factor acumulacion di factornan economico. Esaki ta sosode pa medio di inversion fisico (infraestructura), inversion humano (educacion y entrenamiento) y inversion di conocimiento (investigacion, desaroyo y inovacion). Esakinan lo tin un efecto beneficioso riba e output economico riba termino largo y lo contribui na un crecimiento potencial. Sinembargo, si inversionnan publico ta wordo financia pa medio di subida for di sla di impuesto of pa medio di subida di e deficit presupuestario, cu consecuencia subida di e debe nacional, esaki lo stroba e sector priva pa yega na recursonan financiero, cu na su turno lo impedi inversionnan productivo. E ultimo aki ta netamente loke a bin ta tumando lugar e ultimo añanan aki na Aruba. Pues gobierno a bin ta hiba hustamente un maneho contrario.

E di dos ta provee e incentivan corecto pa medio di e sistema di impuesto y beneficienan. Door di influencia tanto persona- y negoshinan cu decision riba trabou, spaarmento y inversion, sistemanan di impuesto y beneficienan social, lo por afecta e funcionamiento di e economia real. Sistemanan di beneficio social ta hunga un rol importante na coregi fayonan den e mercado sigurando e coherencia social y pa medio di e canalnan aki contribui na crecimiento economico y empleo. Proteccion social por ser mira como un factor productivo. Sinembargo mester sigura cu e sistema di impuesto y beneficio social ta conduci na un participacion y empleo mas halto. Na e momentonan aki nos conoce un sistema di impuesto hopi halto cu ta un factor cu ta stroba iniciativanan, mientras cu parti social cada dia mas y mas ta wordo afecta, dor cu gobierno ta hustamente a bin ta corte den e sistema aki. Mientras cu e trabounan

extra cu ta wordo crea, no ta directamente dirigi riba nos propio mercado laboral, sino dor di busca e forsa laboral for di exterior.

E di tres forma ta provee un clima macro-economico stabil. Un finanzas publico saludabel ta contribui na un estabilidad macroeconomico y ta sostene un politica monetario manteniendo e prijsnan estable y interes abou. Tur e efectonan aki ta conduci na mas inversion priva y un subida na spaarmento. Mantencion di un finanzas publico saludabel pa medio di reduccion di e debe nacional y consecuentemente e interes ariba e debe, ta crea espacio pa reduccion di impuestonan for di sla y/o aumento di gastonan den inversionnan productivo. Finalmente, un maneho financiero corecto tambe lo engrandece crecimiento economico y empleo riba termino largo, cu lo yuda deal cu e presionnan di aumento di gasto, specialmente relaciona cu e sistema di pensioen y salubridad den cuadro di envehecimento di e poblacion. Aki tambe nos por bisa cu gobierno den e ultimo añanan a hustamente haci lo contrario, unda cu mas bien a bin ta hiba un maneho no saludabel y duradero.

Pa realiza bon gobernacion, un maneho di finanzas publico responsabel ta esencial. Di un banda gobierno mester percura pa haya entrada y di otro banda mester trata na domina su gastonan. P'esey gobierno mester tin un sistema fiscal simpel pero severo, cu ta haci posibel cu e ciudadano por probecha lo maximo di loke cu e ta gana, mientras cu Gobierno ta haya e parti cu ta toke pa asina ehecuta maneho, plan- y servicionan na bienestar di tur esnan cu ta biba riba e baranca aki. Mester ta un sistema husto na unda cu ningun ciudadano ta wordo privilegia riba e otro.

Pa e motibonan aki UPP ta convenci cu mester mara finanzas publico na leyman cu lo forsa esnan cu mester carga responsabilidad gubernamental pa mantene nan mes na normanan financiero sostenibel ariba termino largo. Esaki lo garantiza un futuro sostenibel pa generacionnan cu ta bin nos dilanti. Historia y experiencia a demostra cu caminda no tin sancion pa mantene normanan financiero estable, hopi facil ta bai den direccion di endeuda un pais cu tur su consecuencianan financiero y economico. Pa e motibo aki Aruba mester siña di paisnan desaroya, caminda normanan financiero ta ser estableci pa medio di ley.

Legislacion riba tereno di finanzas pa control di gasto

Pa minimalisa e efecto riba nos finanzas publico, UPP ta kere cu mester mara den nos constitucion cu e deficit anual di gobierno no por surpasa 3% di nos producto bruto nacional. Di e manera aki ta evita cu na un forma indiscrimina no ta tene cuenta cu presupuesto y ta fia y gasta placa sin pensa riba e efecto cu esaki tin riba finanzas publico y e futuro di nos pais. Tambe UPP ta na favor pa bini cu leyman cu ta mara e quota di debe di pais Aruba na maximo entre un 40 pa 45% di nos Producto Bruto Nacional. Den esaki tambe ta inclui e obligacionnan financiero, manera debenan na APFA, SOGA etc. Na e momentonan aki nos por mira e relacion di nos quota di debe nacional y e Producto Bruto Nacional, ta rond di 85%, mientras ta premira cu na momento e proyectonan PPP keda termina, esaki lo por surpasa 100% di nos Producto Bruto Nacional.

Public Finance Cycle



Gastonan social

Gastonan social ta contribui grandemente na e deficit actual. Aki nos ta papia di e.o. gastonan di pensioen, tanto esun di biehes general (AOW/AOV), como esun di ambtenaarnan (APFA), mescos cu esun di AZV. Den e cuadro pa contene gasto, UPP ta kere cu pa medio di un Dialogo Nacional, mester papia cu tur esnan involvi, pa asina salba e fondonan aki. Mester garantiza cu esun cu ta contribuyendo awor aki, tambe ta bin na remarca pa cobra

mayan. Cambionan cu bini den nos sistema p.e. di AZV, no mester mishi cu e accesibilidad pa haya cuido, particularmente pa nos grandinan cu ta depende di un entrada so, y tambe pa esnan di menos recurso. No por keda pospone cambionan necesario, haciendo e problema pio, te ora cu ta mucho laat y cu nos tur lo sufri e consecuencianan.

Regula aparato gubernamental

Un aspecto importante den control di gasto ta nos aparato gubernamental. Nos ciudadanonan ta spera di ricibi servicionan for di gobierno cu ta poni como su tarea pa haci. Esaki mester ta eficaz, eficiente y na ora. Den e caso aki mester mira tur esnan cu ta traha den e sector gubernamental, incluyendo e sector semi-gubernamental (fundacionnan, n.v.-nan etc. di gobierno) como “sirbido publico”. Esaki tambe ta conta pa minister- y parlamentarionan. UPP ta boga pa bin cu un ley cu ta regula y reglamenta e funcionnan di consehero y coordinadornan rond di ministernan, mescos cu team di sosten na e oficina di ministernan. Esaki tin cu evita cu defacto ta crea un di dos aparato publico politico costando pueblo hopi placa. Un minister mester traha mas tanto cu su aparato publico y su hefenan di servicio.

Esaki por yuda evita ponemento di hende na trabou den e aparato publico innecesariamente, particularmente famia-, amigo- y privilegiadonan politico, cu na su turno ta conduci na mas gastonan publico pa caha di gobierno. UPP ta propone pa pone na discusion atrobe e rapport di Comision Wever di 1999, cu a traha riba un proposicion den e cuadro aki. UPP ta partidario cu institucion di departamentonan ta sosode por medio di ley (landsverordening), den cual mester determina e cantidad di departamento, funcion- y posicionnan cu ta necesario. Pa yega na esaki lo mester bin cu un “kerntakenanalyse” cu ta determina e cantidad di tareanan y e departamentonan cu mester pa ehecuta esakinan. Asina ta evita e situacion caminda tin dos of te hasta tres departamento cu ta haciendo e mesun tareanan. Como ehempel nos por menciona aki cu riba tereno di medio ambiente tin 5 departamento envolvi, esta departamento di Medio Ambiente, Serlimar, City Inspector, LVV y hasta ATA. Riba tereno di labor nos tin Departamento di Labor y DPL. Limpieza canto di caminda nos tin Serlimar, DOW, LVV, ATA y Proyecto Bo Bario. Despues di un analisis completo di nos estructura di gobierno, lo mester cluster diferente di instancianan aki y sin tin nodi di manda hende cas.

Miho servicio gubernamental

E sistema di un “ombudsman” como un entidad autonomo, manera menciona caba, tambe lo por contribui na un servicio mas miho y eficiente pa nos ciudadanonan. Un ombudsman mester bira e instancia cu e ciudadano ta entrega su keho na dje, entre otro di mal servicio di nos aparato gubernamental. E keho lo wordo investiga y lo exige pa coregi e mal funcionamiento. E ombudsman aki lo mester ta los di gobierno, y ta raporta e.o. na Parlamento di Aruba. Pa mehora e servicio gubernamental, tambe lo mester bin un website www.gobiernonaordo.aw pa e derecho di ambtenaarnan, cu premionan/reconocimento na ambtenaarnan y departamentonan cu ta duna miho servicio na pueblo.

Evalua funcionnan politico

Den e cuadro di controla gastonan gubernamental lo revisa e sistema di rangonan y tambe evalua funcionnan politico, e.o. e sistema di “raadadviseurs”, ya cu e grupo aki ta keda bira grandi y hopi biaha mayoria di nan ta inactivo (dependiendo cua gobierno ta na mando). Mientras pa esnan cu no tin trabou di haci, lo wak pa pone nan den un “passende functie” y si no logra haya nada lo ofrece nan un “afvloeiingsregeling” pa asina gobierno, lesa pueblo, no tin nodi keda paganan pa eternidad. Algo parecido lo mester haci tambe pa esnan cu ta den “overtolligheidspool”. Den e fase aki tambe lo mester mira e posibilidad di “her-, bij- en omscholing” pa asina mira con ta pone e personanan aki na trabou.

Preveni y combati corrupcion den aparato gubernamental

Tur ambtenaar huramenta of contractant cu haya trabou, ta compromete su mes na servicio den nomber di y pa pueblo. E concepto sirbido di pueblo mester wordo inculca den e empleadonan publico na unda cu esaki ta mara na norma- y balornan cu tur hende ta spera cu nan ta cumpli cu ne. P’esey no ta tolerabel cu un empleado publico ta peca contra nos leyman sea pa faborece su mes of privilegia otronan. Esaki tambe lo mester tin su sancionnan di berdad. Tambe pa preveni y combati corrupcion den aparato gubernamental, lo mester bin un fundacion pa “klokkenluiders” cu proteccion pa e “klokkenluider”, mientras cu lo mester bin un website y telefon pa avisanan y tips tocante eventual irregularidadnan. Ta trata aki di instancianan autonomo cu ta los di politica.

Servicio di impuesto

Segun UPP tur hende mester haya e mesun trato riba e tereno di impuesto, tanto ora tin cu paga como ora tin cu haya placa bek di belasting. No tin lugar pa hacimento di excepcion pa un, y pa e otro no, ora cu ta trata di casonan igual pa ley, of cierto faborecimiento (politico). Mester existi igualdad y un trato husto. Pa elimina e tipo di politica aki

riba menciona, UPP ta kere firmemente cu a bira tempo cu e servicio di impuesto aki na Aruba bira un entidad autonomo, mas leu di gobierno y di politica. Pues un influencia politico minimal. UPP ta pensa aki na un estructura parecido na Banco Central y mara den nos constitucion. E modelo aki sigur no ta uno inusual, ya cu hopi pais tambe ta adaptando nan mes te na cierto grado di autonomia. A base di “guidelines”, manera ta wordo proponi door di Organisation for Economic Co-operation and Development (OECD), por regla con un pais ta institui un servicio asina, na unda cu ta wordo regla tumamento di hende na trabou, preparacion di



maneho, tumamento di decision etc. Mescos cu gobierno por pone presion pa impuesto wordo paga, UPP ta kere cu gobierno na su turno

tambe lo mester wordo forsa pa ora di restitution, esaki wordo paga na tempo. Sino gobierno tambe ta obliga na paga interes riba e placa cu e debe e ciudadano pagado di belasting.

Sistema di impuesto

UPP ta kere cu nos sistema di impuesto mester bai den un direccion mas simpel, pero cu na su turno ta severo, den sentido cu control adecua ta wordo ehecuta y cu su eventual sancionnan ora di incumplimento. Mester pone e mecanismonan di control cu tin “in place” funciona manera mester ta, pa asina gobierno ricibi e parti husto cu ta toke, pa e por haci su trabou pa comunidad y haci inversionnan necesario den nos economia y cu ta garantisa trabou duradero.

Den cuadro di e pensamiento cu nos sistema di impuesto mester bira mas simpel, y teniendo na cuenta cu nos ta un pais cu tin e impuestonan mas halto den mundo, UPP ta mira cu ta tempo pa nos cuminsa pensa pa baha e peso di belasting tanto pa nos ciudadanonan como nos comercio y negoshinan. Den cuadro di e revision di nos sistema di impuesto aki lo

scohe tambe pa minimalisa e aftrekposten pa asina compensa e rebahao di impuesto aki di un banda, mientras cu lo percura tambe pa trabou di control di aangiftenan ta bira mas liviano. Esaki ta conduci tambe cu lo e tempo di regla e impuesto ta bira mas cortico. Sauvisando e trabou di e empleadonan di direccion di Impuesto, ta haci tambe cu tin mas tempo pa vigila e companianan y negoshinan cu ta keda atras cu nan cumplimiento cu impuesto, y evita cu inversionistanan ta lanta buelo bay sin cumpli cu loke ta nan obligacion di impuesto.

Den e cuadro aki UPP ta partidario pa un schuifmento di impuesto directo pa uno indirecto, mientras cu lo mester studia cierto cambionan den nos regimen di invoerrechten y accijns.

Lo mester adapta nos inkomstentabel, bahando e tarifa di belasting riba entrada substancialmente, mientras BBO como impuesto indirecto mester wordo revisa y haci mas simpel y controlabel. Un cambio adicional cu UPP kier implementa ta cu un tienda mester muestra su cliente e prijs incluyendo BBO, contrario na e sistema actual na unda e cliente ta haya sa e suma total te ora e tin cu paga. Riba e recibo e cliente mester por wak cuanto a paga na BBO.

Cu schuifmento di belasting directo pa indirecto, esnan cu ta traha “zwart” y esnan cu ta bishita nos isla, tambe ta bai contribui por medio di e belasting indirecto na e caha di gobierno. Na momento di e cambio di directo pa indirecto lo evalua pa baha impuesto riba negoshi. Esaki na su turno lo pone cu nos comerciantenan por inverti mas den nan negoshi y tambe por atrae inversionistanan di afor. Teniendo na cuenta cu e efecto di rebaho di inkomstenbelasting ta nulo of minimal pa esnan di un entrada abou (ya cu nan ta cai den e belastingvrijevoet), pa no afecta e poder di compra di esnan di entrada abou, UPP ta kere cu mester evalua un sistema unda cu pa e categoria aki, no ta paga e “werknemersdeel” di e primanan. E primanan social no conoce un “vrije voet” y pues ta pisa hopi. Esaki tin como resultado cu e trahado ta keda cu mas salario den su man, pa asina compensa un belasting riba consumo. Pa no afecta e

entrada di SVB y AZV hopi, e werkgeversdeel si lo mester keda intacto, ya cu e porcentahe di esaki ta mas halto cu e werknemersdeel.

Ketenaansprakelijkheid

Un otro sistema pa evita cu impuesto y primanan social no ta wordo reteni y paga, ta e asina yama “Ketenaansprakelijkheid”. Cu introducción di un ley asina ta pone contratistanan responsabel pa e impuesto y primanan social di e subcontratistanan. Hopi biaha e sub-contratistanan no ta paga e placa cu nan ta kita for di nan trahadonan. Un punto positivo di esaki ta, cu e ta aporta na un competencia mas husto entre e contratistanan. Contratistanan cu ta cumpli cu nan debernan fiscal hopi biaha tin cu ofrece un prijs mas halto cu esnan cu no ta cumpli cu nan debernan fiscal. Door cu nan no ta retene e sumanan pa belasting y primanan social, nan prijs ta mas abou cu e companianan cu si ta cumpli.

Control riba impuesto

Pa loke ta trata e afdracht di belasting, especialmente pa loke ta trata BBO, controlnan mester ta mas severo. Den futuro por pensa hasta na link e cashregister den un sistema cu ta gelink cu SIA of sistemanan cu por garantiza e informacion necesario pa e trabou di control di SIA. Por bin cu un sistema di code unda bo por wak tambe kico ta e articulonan cu ta cay bou di BBO y cua no, pa control, tambe pa ciudadano. Tambe riba e aspecto di entradanan “no declara” SIAD lo mester intensifica su controlnan e.o. por medio di e sistema di IB50.



Desaroyo Economico

DIVERSIFICA Y FORTIFICA NOS ECONOMIA

Aruba, mescos cu hopi isla, ta conoci pa su recurso- y fuentenan di entrada limita. Nos conoce un economia chikito, tanto pa loke ta e aspecto interno como esun externo. Den siglo pasa refinacion di petroleo tabata un di fuentenan di e entrada mas importante, sigui despues den añanan 1960 pa turismo. Na final di siglo pasa y e siglo aki, turismo a pasa pa ta e pilar mas importante, mientras cu pa nos pais.

Apesar cu gobierno durante e ultimo 8 añanan gobierno a priminti di desaroya otro pilarnan, nos por bisa cu esaki no ta e caso, y nos ta dependiente di e unico pilar economico, cu ta turismo. E pilar economico cu tambe no ta pasando den su momentonan.



Nos tur sa cu banda di solo, biento, beachnan bunita y nos recurso humano, Aruba no tin mucho recurso natural. Speranza ta cu bou nos subsuelonan di laman nos lo por haya gas of petroleo un dia, cu lo por duna Aruba e oportunidad di desaroya su mes cu e recursonan natural aki. Ta bon pa remarca aki di biaha, cu pa UPP, tur gas y/of petrolio cu wordo haya den subsuelo di Aruba, ta wordo considera patrimonio di pueblo, pa cua motibo ningun multi-nacional por bira doño di dje. Realidad te na e momentonan aki ta cu no tin otro materia prima, mientras cu loke ta cria, pesca y agricultura keto bai por wordo considera na un nivel abou, cu den nos cifranan di con habri y grandi (of chikito) nos economia ta, e ta keda marginal.

Te na e momentonan aki e otro recursonan cu nos tin, mas bien ta garantiza cu nos tin un sector of pilar turistico hopi desaroya y cu

anualmente ta ricibi hopi bishitante. Esaki na su turno ta duna hopi hende trabou.

Banda di e recursonan natural, nos tin e recurso di hende, pa cual den e sector di servicio ta duna entrada pa e trahadonan y pa e pais.

Cu un economia chikito, esaki ta encera tambe un mercado local chikito. Apesar cu nos poblacion y e cantidad di turistanan a aumenta den e ultimo decadan, ainda Aruba su mercado ta relativamente chikito. Ta esencial pa haci un estudio pa wak riba ki nivel mas lo por bin cu cierto produccionnan pa abastece tanto e hotelnan como nos comunidad local. Asina por pensa riba e posibilidad di cria di tilapia of otro tipo di cultivonan.

Diversificacion

UPP ta di opinion cu e desaroyo economico di Aruba mester ta dirigi riba fortificacion di e sector turistico y ampliacion di otro sector economico.

Bou di e otro sectornan UPP ta mira e.o. exploracion y explotacion di posibel rikeza natural, desaroyo di energia renovabel y sostenibel, basea riba e concepto di “blue economy”, cu ta basa riba e.o. recycclahe y riba uso di desperdicio.



Mescos tambe UPP ta mira e desaroyo di e sector industrial, particularmente cu industrianan high-tec y limpi. Tambe e industria creativo mester haya oportunidad pa wordo desaroya aki na Aruba. Den e cuadro aki nos no ta mira espacio pa e refineria den e condicion actual cu e ta. Por lo demas mester stimula e sector di servicio, administracion y di comercio, particularmente negoshinan chikito. E ultimo aki basa riba tecnologia moderno cu e era nobo di informacion y cybernetico ta ofreciendo nos.

Naturalmente e sector agricultural, di cria y di pesca, mester wordo enforsa cu buscamiento di sistemanan nobo y economico di produccion.

Nos mester ta consciente cu produccion di productonan local sigur ta nifica un prijs mas halto cu loke nos tur lo ta desea di paga. Pa Aruba tin exito riba un politica economico di produccion ta necesario pa esaki ta un producto cu por wordo exporta. Tambe UPP ta kere gobierno lo mester stimula, pa medio di incentivanan, tur nos young professionals y entrepreneurs cu ta dispuesto pa bin cu iniciativanan nobo cu por hiba nos na crea un sector economico nobo cu ta hopi necesario, mirando awor cu e refineria a sera su portanan. Banda di e tipo di diversificacion aki, ta importante pa mira riba tereno di servicio pa cu exterior kico mas por wordo haci pa Aruba por fortifica e pilar aki. Aruba lo mester profila como un centro di servicio pa cu Latina America y tambe Caribe. Banda di esaki mester desaroya Aruba den un hub comercial, tanto pa loke ta aviacion como esun maritimo. Aruba tin pa e ultimo aki sigur infraestructura na su disposicion. UPP ta kere cu pa San Nicolas ta importante pa desaroya e haf, mirando awor cu e refineria a wordo sera. Banda di e sector turistico, sector industrial y di servicio, di mes lo desaroya e sector administrativo y commercial.

Maneho economico en general

Manera apunta aki riba caba, den un gobierno nobo mester bai traha riba e tereno di diversificacion. Tambe gobierno mester bai stimula mas negoshi chikito, na unda cu por medio di departamento di Asuntonan Economico ta sigui enfoca riba esaki.

Specialmente e aspecto di young entrepreneurs lo mester haya mas contenido y sosten, pa asina stimula comerciantenan jong pa bin cu propio negoshinan, por medio di incentivanan fiscal. Aki ta unda cu UPP ta boga tambe pa bin cu e “Mededingingsverordening” cu pa medio di un autoridad special ta combati e fenomeno di formacion di cartelnan cu hustamente ta stroba cualkier desaroyo economico. Asina ta evita tambe competencia inhusto pa esnan cu kier cuminsa inverti, sea local of

stranhero. Entre otro esaki ta ocasiona tambe e stagnacion economico cu nos ta pasando aden.

Hunto cu esaki gobierno lo mester tambe duna e sosten necesario na nos companianan local, door di duna nan e oportunidad pa realisa trabounan cu ta wordo financia for di fondonan publico. Den e ultimo añanan nos por mira con mas y mas compania di afor ta haya proyectonan grandi pa realisa, y hopi di nan ta compania grandi. Tin di nan ta Hulandes y otro for di region. Djis pa menciona nos por wak e spiraal rotonde, ponemento di rail den Caya Betico Croes, Linear Park, etc. Den e parti aki gobierno lo mester ta mas flexibel den e pagonan cu ta wordo haci na contratistanan cu ta realisa trabou pa gobierno, ya cu e termino di pago hopi biaha ta mucho largo y e companianan aki no por carga esaki pa largo.

Den e cuadro aki lo mester bai na revisa e sistema di permiso di negoshi. Particularmente mester bai mira con por restringi e competencia inhusto di negoshinan di stranhero cu ta sigui haci uso di e asina yama “stromanschap” aki na Aruba. Tambe mester agilisa e proceso di otorgamento di permiso pa esnan cu kier cuminsa habri negoshi.

Desaroyo Duradero

UPP ta di opinion cu ta importante pa hiba un maneho di un desaroyo duradero y sostenible, door di promove e proceso di recursonan renovabel, por medio di reciclahe. Energia alternativa tambe ta un aspecto cu lo mester traha riba dje basa riba estudio di factibilidad.

Mester ta un desaroyo cu na su turno ta trece actividadnan economico pa e isla di berdad. E tempo di show y buya, di conferencia y pusha placa den ideanan di otro hende mester ta pa pasado. Aruba mester existi awor resultado berdadero, envez di gastamento di placa djis pa cosmetica. Di acuerdo cu e plan 2025, e desaroyo riba e tereno aki lo mester ta uno dirigi riba conscientisacion berdadero y educacion na scol y informacion

via medionan di comision riba e importancia y e balor di un desaroyo asina.

Gobierno lo mester bay hunga un rol mas activo den cuadro di reciclahe, estimulando school- y clubnan, mescos tambe gruponan hubenil, manera scouting, pa nan participa na programanan di reciclahe. Aki ta unda cu lo bay tin mas atencion pa e concepto di “Blue Economy”.

Desaroyo duradero mester ta un “way of thinking” y “living”. Na momento cu ta scohe p’esaki e mester ta algo integral.

PARIBA DI BRUG – UN ATENCION SPECIAL

Den e prospecto economico di Aruba cu lo mester wordo prepara pa e gobierno nobo, UPP como parti di gobierno lo pone special atencion na San Nicolas. Lo

mester bini cu un taskforce special pa studia e

posibilidadnan. E proceso pa reactiva e bida economico di San Nicolas, cu a cuminsa durante e

prome decada di e siglo aki y cu a wordo gefreeze pa e gobierno actual, lo mester bolbe haya atencion. Asina nos por a mira con diferente departamentonan di gobierno a wordo hiba San Nicolas, mientras cu otro instancianan manera AZV, SVB, Arubus, FCCA etc. a habri sucursalan. Esaki pa duna un miho servicio na e pueblo, pero tambe pa crea un ambiente economico mas positivo y estable pa San Nicolas. Nos por a ripara cu pa 8 año no tabata tin e iniciativanan necesario pa percura pa un desaroyo economico na San Nicolas.



Un desaroyo nobo pa San Nicolas basa riba industria limpi

UPP ya caba na 2013 a mostra cu Aruba mester cuminsa siña biba sin e refineria. Apesar cu e situacion financiero di Aruba a pone cu un eventual reapertura di e refineria mester lo por a nifica un alivio temporal. Pero al contrario, gobierno a yega na un acuerdo cu Citgo pa establece un “upgrader” y cu ainda nos no por wak su frutonan. Mientras cu UPP na varios ocasion a mostra cu e contrato cu casi full Parlamento a bay di acuerdo cu ne, tin condicionnan strangulante aden pa nos pueblo y cu yen di risico. Pa UPP un refineria pa Aruba por ta viabel, pero si uno completamente nobo, basa riba un state of the art refinery, cu ta cumpli cu tanto tur reglanan ambiental y tecnologia moderno.

UPP ta boga pa reactivacion di economia na San Nicolas, basa den principio ariba otro actividadnan economico, particularmente na e sitio unda e refineria ta ubica na e momentonan aki.

Pa cuminsa UPP ta kere cu e waf di San Nicolas lo mester wordo desaroya den un haf industrial y commercial. Tambe UPP ta pensa riba e posibilidad di trasbordo (hub) y tambe un dry-dock. Y combina cu esaki un posibel scol Maritimo, cu ta prepara nos hendenan pa traha den e sector nobo aki. E ultimo aki ta duna oportunidad di trabou tambe na esnan cu a perde trabou ora di cierre di refineria.

Lo ofrece incentivonan special pa companianan cu lo kier establece nan mes na San Nicolas. UPP ta kere cu mester bin cu un agencia institucionalisa cu lo bai traha riba e puntonan aki, na unda cu lo mester tin personanan di tur partido aden, sin e politisacion di esaki, ni interes personal, manera a bin ta sosode ultimo añanan.

E tereno di refineria lo por wordo dividi den un zona industrial y un free zone. E zona industrial lo ta dirigi riba industria limpi y di high-tec. Riba tereno di procesamiento di sushi UPP ta kere cu e tereno di e refineria tambe lo por sirbi. Aki nos ta papia di un proceso segun standard moderno, basa riba e concepto di “blue economy” – economia circular, y

cu ta contribui na un medio ambiente mas limpi y sano, cu ta contribui na e proceso di recursonan renovabel por medio di reciclahe.

Re-animacion di San Nicolas

Ademas lo bai mira otro posibilidadnan pa hiba mas servicio San Nicolas, manera un keuringslokaal extra, un instituto di cultura y deporte. Lo studia e posibilidad di haci B. v.d. Veen Zeppenfeldtstraat un “public workers street” door di hiba departamentonan di gobierno pariba. Pa loke ta e problematica di prostitucion esaki tambe lo mester wordo soluciona door di mande na un otro sitio.

Manera menciona caba bou di parti di salubridad, Centro Medico San Nicolas, IMSAN, lo sigui cu e idea original di comberti esaki den un hospital pa duna servicio na e comunidad na prome luga, pero tambe pa amplia esaki cu servicionan cu tin di sirbi nos turismo. Di e manera aki dunando un empuhe economico na San Nicolas.

Centro di Gobernacion pariba di brug

Pa loke ta trata Centro di Gobernacion, UPP ta kere cu un mudamento di esaki pariba di brug lo trece mas actividad pariba. Di e manera aki ta crea tambe sitionan extra pa turistanan por bishita. E centro actual di gobernacion, sea por bira un centro di cultura y historia multi funcional, na unda cu historia y cultura di nos pais ta wordo etala. Den e edificionan aki por ubica parti di nos Biblioteca Nacional, esta Arubiana, Archivo Nacional, Departamento di Cultura, y otro instancianan riba e tereno aki. E centralisacion aki lo sirbi tambe como modelo di cooperacion entre departamentonan cu e fin tambe pa ta mas eficiente y cortando gastonan.

Turismo

ARUBA NO A DESCUBRI MUNDO AINDA!

Turismo ta un, pa no bisa e unico, pilar importante pa cu nos desaroyo economico y entrada pa pais Aruba. Atencion lo keda wordo duna na esaki. UPP ta convenci cu Aruba por logra un maneho di turismo mas efectivo. E manera cu Aruba ta wordo promovi actualmente tambe por wordo mehora.

Apesar cu e tendencia ta pa nos sigui traha riba expansion di cambenan, UPP ta kere cu mester bin cu un moratorio, ya cu construccion di mas



hotel, ta nifica creacion di cuponan di trabou pa hendenan di afo. Esaki na su turno lo pone mas presion riba e situacion di tereno y tambe otro aspectonan

manera un AZV, mas scol, mas auto. Pues UPP ta kere cu mester ta cauteloso den sigui cu expansion di mas hotel, pa asina nos no haya cu nos ta tornu na nos calidad di turismo.

E situacion actual

Na prome lugar nos mester weita turismo den e proporcionnan corecto, pasobra gobierno mes ta presenta esaki mucho mas bunita cu realmente ta e caso.

Pa e turista di time-share gobierno NO mester haci nada na marketing of promocion, pasobra e turistanan aki tur aña di mes ta bolbe den e siman

fiho di nan time-share. E presupuesto haltisimo di ATA pues ta trece unicamente rond di 600.000 turista, y NO 1 miyon, manera ta wordo bisa. E 3 of 4 porciento di aumento anual di e cantidad di turista, no ta nada compara cu e progreso di turismo pa otro islanan den vecindad. Hopi otro isla manera Virgin Islands, Puerto Rico, St. Maarten, Curaçao, Republica Dominicana, Bahamas, Cuba, Cayman Islands, ta muestra aumentonan substancial. E ultimo añanan Aruba a muestra di ta keda atras den su crecimiento compara cu otro paisnan den Caribe.

For di Europa tambe Aruba ta faya den turismo; contrario na esaki hopi turista di Europa ta bay Republica Dominicana, Cuba, Barbados, Jamaica, St. Maarten y Antigua. Aruba mester por haci mucho miho.

Cu un bista riba e situacion no mucho faborabel aki UPP ta kere cu nos mester bay na pone mas atencion na diversificacion di nos producto turistico y alabes mehora e calidad di nos turismo, pa asina hisa e cantidad di bishitantenan.

Un isla mucho mas atractivo y limpi

“Berde y Limpi” ta un requisito esencial. Turistanan, principalmente Mericanonan, ta hopi consciente di bacterianan, infeccionnan, malesanan, virusnan, y ta evita di bishita destinacionnan cu ta conoci pa NO ta limpi. Solucionnan riba termino largo ta consisti entre otro di boetnan pa restonan di auto laga atras; parti e isla den 12 pa 15 distrito na unda 2 pa 3 hende cu auto y material ta tene nan distrito limpi. Hotelnan mester wordo obliga pa tin suficiente parkeo, y pa tene e area dilanti di e hotel limpi. Tambe mester tin un mihor vigilancia di nos beachnan, unda cu esnan cu ta haci uzo di esakinan, hopi biaha ta laga susedadnan atras cu ta mahos bista y alabes malo pa nos medio ambiente.

Edificionan bieu y decai mester wordo benta abao, of drecha manera John F. Kennedy school; tur e area for di waf te cu Bushiri ta sushi y no ta atrae turista. Esaki tambe ta conta pa partinan grandi di Oranjestad. Hopi di nos no ta weita e desorden y e viesedad mas, pasobra nos a custumbra cu nan; pero pa un turista Aruba ta hopi vies y no ta atractivo. Edificionan na Aruba, casnan, hotelnan, restaurantnan, tur mester wordo construi

mucho mas bunita. Lo bini cu un maneho unda cu inversionnan den proyectonan nobo, sea negoshinan, malls, etc. ta obliga pa bini cu verfraaing di p.e. parkinglotnan etc., pa asina minimalisa e apariencia di ta un isla di beton.

Coneccionnan Aereo Internacional

Aruba mester haya mas coneccionnan aereo internacional. Continuamente Aruba mester keda traha activamente pa atrae vuelonan for di Inglaterra, Suecia, Alemania, Italia, Brasil y Argentina. Tambe mester pensa riba turismo for di Hapon y China, di cual e ultimo ta un economia emergente.



Nos producto y su mehoracion

E sistema pa book camber di hotel via internet online ta yuda pa turistanan for di tur skina di mundo book nan camber directamente, y especialmente cu hotelnan chikito e resultadonan ta hopi positivo. Mester bay si na vigila mas e tendencia actual pa busca alohamento via Airbnb y hotelnan all-inclusive. Pues na unda cu nos ta mira cu mas bien turistanan di categoria barata ta wordo atraí, cu na su turno lo afecta e producto turistico.

Aruba mester bira mucho mas agradabel y ameno, y mester ofrece hopi mas entretenimiento y diversion. Plaza Daniel Leo lo por wordo desaroya den un “plaza” central, manera nan ta existi den sur di Spaña, y cu lo ta un sitio ameno unda tanto localnan como turistanan ta topa otro. Un restaurant grandi den aire liber tambe por ta parti di e proyecto. Riba boulevard entre The Paddock te cu Mar Azul por crea un boulevard estilo St. Tropez Mediterranean, cu

entretenimento y barnan y café’s cu nan propio live entertainment. E standnan di souvenir por muda pa otro banda.

Den cooperacion cu hotelnan mester yega na renobacionnan den hotel y den camber, y den un esfuerzo “island-wide” mester trata na upgrade tur hotel. Turistanan ta exige bañonan tipo nobo, un decoracion mas residencial, y lo ultimo riba tereno di tecnologia (automated touch sensitive mini bar, personalized retrievable voicemail, room entertainment center, music on demand, mood/lighting on demand etc.).

Aruba mester tuma e rol di lider den Caribe riba tereno di lo ultimo den up-to-date novedadnan tecnologico.

Haci San Nicolas un destinacion turistico special

Pa diversifica nos turismo, oficina di turismo mester bay enfoca mas riba actividadnan di deporte internacional. Asina mester mira pa atrae ekiponan profesional pa bin Aruba y haci nan entrenamientonan. Esaki por trece nan entourage di fanaticonan turistico. Por pensa aki riba futbol, tennis, bowling, baseball. Principalmente na Baby Beach lo por pensa bin cu stadion pa beach volleyball, tenis y futbol.

Manera elabora bou di e parti di salubridad y economia e turismo medico lo por trece cu ne tambe un “wealth and health center” pa San Nicolas. Na mesun momento e desaroyo di San Nicolas como destinacion turistico ta haci cu Aruba por fin lo por ofrece tambe un producto berdaderamente tipico di Caribe, di cua e sinergia riba turismo pa Aruba por wordo compara cu e influencia di e parti Frances di St. Maarten riba turismo pa henter e isla ey.

E desaroyo aki ta encera automaticamente cu San Nicolas mester wordo drecha den un programma di 5 año, por medio di un San Nicolas Board Esaki mester wordo haci profesionalmente door di un diseñador renombra.

Entretenimento, distraccion, excitacion, reputacion

Continuamente Aruba mester ta y keda den noticia. Esaki ta posibel por medio di un variedad di actividadnan anual. Como ehempel nos por menciona Golf tournaments, Windsurfing Championships, Aruba Film Festival, Beach Tennis Championships, Aruba Jazz Festival, Aruba Fashion & Design Festival, Aruba Piano Festival, Salsa Dancing Month, soul Beach Music Festival, Aruba Culinary Festival y Catamaran regatta. Creatividad por amplia e lista aki.

Marketing y Promocion

Aruba mester cumenza haci uso di World-wide marketing, na lugar di solamente conta storianan bieu riba marketing na Merca, Venezuela y Hulanda. Internet ta yega tur skina di mundo, pues mundo henter mester ta nos mercado y nos target. Hotelnan chikito pero sabi, ya ta yega cerca e turista na Singapore, te na e aldea mas chikito na Dinamarca!

Aruba mester profila su mes como e miho destino di calidad den henter e region di Caribe. Pa haci esey, Aruba mester haci hopi mas uzo di e medianan di luho manera Conde Nast Traveler, Architectural Digest en National Geographic.

Aruba mester bay haci hopi mas na “social media promotion”. E miho hendenan den media social y diseñadornan di apps no ta sinta den “silicon valley”, pero den centro di Amsterdam. Usa e hendenan aki pa promote Aruba via e media social.

Hotelnan na Aruba ta atrasa sigur pa 5 te 7 of 8 año den e desaroyo- y posibilidadnan actual. Hotelnan tambe tin culpa den e desaroyo menos positivo di nos turismo. Den tur e hotelnan tin solamente 4 unda e turista na un manera facil y lihe por haci reservacionnan online cu “availability calendars” y prijs.

Si hotelnan tuma reservacionnan online pa “custom-made packages” pa camber, pa autonan di huur, pa cualkier actividad riba e isla, y tur esaki “seamless” y “non-commisionable”, esaki por trece hopi mas turista

NOBO for di cualkier parti di mundo, y cu awor ta bay otro destinacionnan cu ta actua mucho mas sabi.

Turismo di Medico

Ya caba door cu a cumenza for di 2009 cu ponemento di e “eerste lijn zorg” (cuido di dokter di cas) riba un liña por medio di dokter di cas na Aruba y tambe door cu a crea e posibilidad di “bij en nascholing” na Aruba mes, a hisa e nivel enormemente. Door di esaki nos por papia di un “gezondheidswinst” den e cuida curativo. Esaki mester ser amplia den e segundo linea, esta e “Cuido Medico Specialisa”. Esaki lo mester sosode hunto cu exigencia cu institutonan di ciencia medico di Hulanda y/of den regio ta haci mas investigacion medico aki na Aruba. Na su turno esaki lo por laga e turismo medico florece.

Mester por crea varios “one-stop-shop” riba diferente tereno di cuida. Ya caba tin esun di Cuido Diabetico y por haci esaki tambe cu Cuido Cardio Vascular, Cuido Oncologico y Cuido di Obesitas.

Nos mester hisa e nivel di salubridad na un otro nivel door di integra esaki den economia di Aruba y trata di haci esaki un otro pilar economico.



Proteccion Laboral

PROTEHANDO E TRAHADO Y SU ENTRADA

UPP ta kere firmemente cu e Arubiano, tanto esnan di generacionnan largo como esnan cu a scohe Aruba como nan hogar nobo, tin derecho riba trabou. Den e cuadro aki tambe mester pensa riba e hubentud cu ta termina nan enseñanza na Aruba y ta scohe pa bai den e proceso laboral,

mescos tambe riba esnan cu ta preparando nan mes profesionalmente den exterior y cu kier regresa Aruba. Deber di gobierno y di comunidad ta pa garantisar oportunidad di trabou pa nos trahadonan local prome y hiba un maneho di admision estricto cu e unico meta pa proteha nos forza laboral y nos recursonan limita (manera tereno). Den bista di esaki ta importante cu crecimiento di nos poblacion pa medio di inmigracion mester ta uno responsabel, teniendo na cuenta tambe cu e recursonan di nos pais pa cubri e provisionnan e.o. riba tereno di nos seguridad social ta limita. Un politica indiscrimina o sin limite di porta habri ta hopi peligroso pa tur e provisionnan manera AZV, AOW y AOV, etc. Hustamente pa crea espacio pa nos sector priva por desaroya su mes cu e fin pa crea cuponan di trabou pa nos hendenan, UPP ta aplaudi y motiva tur forma di iniciativa particular. A lo largo esaki mester desemboca den trabou, prosperidad y bienestar pa nos pueblo.

Pa loke ta e movilidad di trabou y oportunidad di trabou pa particularmente nos hende jongnan, UPP ta mira cu e adaptacion di e pension di viehez na e edad di 65 hustamente como un estorbo pa oportunidad pa nos hobennan. UPP ta di opinion cu den un proximo gobernacion, lo mester bay na haci un estudio riba e edad di pension y wak si ta posibel pa adapta esaki na un edad mas abou. Esaki pa duna nos hobennan mas oportunidad di trabou. Naturalmente mester tene cuenta cu e situacion real di fondo, prome cu tuma tal paso.

UPP ta kere cu ainda tin hopi aspecto cu mester wordo atendi pa asina garantisar e proteccion laboral necesario.

Loonbelasting, AZV, AOV y AWW

UPP ta kere cu den e aspecto laboral e proteccion laboral di nos trahadonan mester ta central. Riba e sistema di “inhouwing” di loonbelasting, prima di AZV, AOW/AWW, mester percura pa un control mas severo na momento cu un doño di trabou no ta cumpli cu su obligacion di pago di e primanan aki. Mester implementa boet, ya caba na momento cu tin atraso di dos luna y cu menaza di ponemento di beslag.

Lo institui un number di telefon special cu trahadonan por yama ora nan ta ripara cu nan doñonan no ta traspasa e placa reteni. Mester conscientisa e trahadonan pa controla y warda nan slipnan di salario, pa asina evita cu despues nan ta haya nan den problema ora cu doñonan no ta traspasa e placa reteni na servicio di impuesto. Hopi biaha ora cu e doño di trabou su debe, incluyendo loke e tin di traspasa, ta bira asina grandi, e ta opta pa manda su compania falliet. Ora cu compania bay falliet, y placa no wordo traspasa, e trahado ta keda responsabel pa e debe na pais Aruba. Manera ya menciona bou di e seccion di impuesto, e sistema di “Ketenaansprakelijkheid” mester salbuardia cu e trahado cu a paga loonbelasting, AZV y AOV/AWW, no ta wordo poni responsabel pa “afdrachten” cu NO a tuma lugar.



Pensioen general den sector priva

Pa loke ta e sistema di pensioen general obligatorio pa trahadonan den sector priva, UPP por constata cu tin hopi incertidumbre riba esaki, mirando cu ta reteniendo placa di nan, mientras cu nan no tin ningun clase di comprobante cu enberdad nan ta segura. P’esey UPP ta kere cu mester bai na obliga e dunadonan di trabou pa den un tempo minimo nan entrega un comprobante di seguro na e trahadonan. Esaki desde e momento cu ya ta bai over na retene e prima aki. Tambe mester obliga e compania di seguro pa tur aña entrega un declaracion di seguro na e trahado en cuestion pa di e manera aki segura e trahado cu e ta den un seguro activo.

Posibilidadnan di seguro adicional

UPP den un proximo gobierno lo mira te con leu, den cuadro di garantisa entrada di trahadonan ora di perde trabou, un trahado por segura su mes contra esaki. Esaki di acuerdo tambe cu tratado di International Labor Organisation, cu ta permiti SVB sera seguronan cu ta na beneficio di e trahado y su famia. Dor di laga e trahado dicidi si e ta cumpra cierto servicionan, di un banda esaki ta alivia e bijstand y di otro banda e ta siña pa hendenan cuminsa tuma responsabilidad pa su mes desaroyo y futuro.

Re-introduccion di modelo suizo

Si na 2013 UPP como partido a adverti pa e situacion di porta habri y indiscrimina, awe na 2017 nos por mira cu realmente cosnan a bay for di man. Den cuadro di e proteccion di e mercado laboral Arubiano, ta importante pa bini cu quota acceptabel p.e. di 80 – 20 pa e ocupacion laboral entre nos localnan y esnan di afor. Hopi biaha esaki den porcentahe ta diferencia hopi. Saliendo for di e pensamiento cu Aruba ta full, lo mester sera nos fronteranan, sigur mirando e situacion economico malo cu Aruba ta pasando aden. Lo aplica e modelo suizo di 3 aña, na momento cu ta necesario pa importa trahado for di exterior.

Incentivonan

Tambe UPP ta kere cu ta hopi esencial cu Departamento di Labor stimula e doñonan di trabou pa duna mas oportunidad na e trahadonan pa nan upgrade nan mes den nan ramo di trabou. Esaki ta habri posibilidad di progreso (promocion) den nan trabou y mehora asina nan standard di bida. Di e manera aki ta evita pa busca hendenan di exterior pa cubri posicionnan clave den companianan. Por pensa aki riba iniciativanan di gobierno pa empleadonan sigui studia na Aruba mes, door di bini cu estudionan mas avanza riba tur nivel. Aki lo mira e posibilidad di duna un aftrek riba winstbelasting di e doño di trabou cu ta permiti su

empleado participa den un programa asina pa upgrade su mes. Hustamente den temporada di recesion economico ta mas cu imperativo cu atencion ta wordo poni na educacion y upgrading di nos forza laboral. UPP ta consciente cu tin hopi posibilidadnan pa stimula desaroyo di e empleado cu lo mester wordo explora.

Iniciativanan pa trahadonan cu handicap fisico y/of mental

Pa evita discriminacion di trahadonan cu handicap fisico y/of mental lo bin cu iniciativanan pa promove nan participacion y aceptacion den e proceso laboral p.e. door di discriminacion positivo of introduccion di un quota. Tambe mester inverti den educacion adapta pa muchanan cu handicap fisico y/of mental pa duna nan un miho preparacion y oportunidad di participa den mercado laboral. Nos lo elabora mas riba esaki den e seccion di enseñanza.



Proteccion di ofishinan

Banda di e proteccion di nos mercado laboral local, UPP ta propone pa amplia nos leyman di tal modo, cu cierto ofishinan tambe ta cay bou un proteccion special, unda cu esakinan ta wordo reserva pa nos localnan, yiunan di tera. Di e manera aki nos por garantisa nos hobennan cu kier regresa su pais despues di su estudio, por tin oportunidad di haya cuponan di trabou. Den caso di un necesidad agudo, e ofishinan aki lo wordo cubri pero pa un periodo cortico.

Ley Laboral

E Ley Laboral vigente y cu a wordo introduci algun aña atras, keto bay na opinion di UPP y di hopi trahadornan aki na Aruba, no ta dunando e trahado, particularmente esun local, e proteccion necesario. Nos por a mira e casonan di Aura Casino y Sr. Frog, con desampara e trahadornan a keda. Y asina tin mas casonan cu no ta yega na


conocemento publico, pero cu ta bira un drama pa famianan aki na Aruba, na momento di perdidad di trabou.

P'esey UPP ta boga pa modernisa of actualisa nos leyman laboral conforme e exigencianan di ILO (International Labor Organization). Asina nos por menciona e.o. prevencion di accidente laboral. Pa medio di inspeccion y controlnan mas severo por evita accidentenan (inseguridad). Mester obliga e dunado di trabao pa duna su trahadonan ekipo di proteccion. Na momento di incumplimento lo aplica sancionnan conforme e exigencianan di nos Ley Laboral.

Trabao na unda seguridad y salud ta hunga un rol, tanto di trahadonan como tercera, companianan mester ta certifica pa e tipo di trabou cu nan tin di eherce, mientras e trahado tambe mester haya un upgrade pa por haci e trabou aki.

Ampliacion di Derecho di Encuesta den nosCodigo Civil

Den cuadro di e pensamiento di proteccion laboral, y mirando kico a pasa na Aura Casino y Sr. Frog, partido UPP ta na fabor pa amplia e derecho di encuesta (na Hulandes yama enquêterecht) den nos codigo civil. Mescos cu e ta e caso na Hulanda, e trahadornan den un compania of consorcio, p.e. pa medio di su sindicato cu ta representanan, haci un peticion na juez pa haci un investigacion riba e maneho y practica di su compania. Esaki particularmente ora ta trata su pan di cada y tambe na momento cu e ta wak su interes y interes general por wordo afecta. Banda di e dos ehempelnan aki riba unda cu cos a bay malo, nos por pensa p.e. e situacion cu a surgi na InselAir, e situacion algun tempo atras



na WEB Aruba N.V. Pues e ampliacion aki di e derecho di encuesta lo ampliacion di e proteccion di e derecho laboral.

Leyman Ocupacional

Como parti di proteccion laboral y cu tin su influencia riba salud di hende, ta necesario pa bin cu un Ley Ocupacional, unda ta wordo promovi pa traha na un forma preventivo (prevencion) riba area di Salud, Seguridad y Bienestar.

E ley ocupacional aki hunto cu e Ley Laboral lo contribui na y intensiva e lasonan di colaboracion y cooperacion entre e dunado di trabou y e trahado, unda Salud, Seguridad y Bienestar ta na prome lugar. E proteccion aki mester conta pa tur trahado sin distincion di sexo, edad of origen. Introduccion di un ley asina, combina cu esun laboral lo contribui pa asina Aruba haya e reconocimiento internacional p.e. di ILO.

Adaptacion di salario minimo

UPP ta kere cu na luga di bini cu incentivonan complica y cu no ta muestra di ta igual pa tur hende y cu por wordo uza na un manera inapropia manera ta e caso di “reparatietoeslag”, mester keda cumpli cu e adaptacion di salario minimo manera cu ley ta prescribi. Manera menciona caba nos sistema fiscal mester bai di un sistema directo pa uno indirecto. Tambe por bai adapta di un banda e belastingvrije voet y baha tambe e quota di belasting cu na e momentonan aki ta wordo paga. Pa combati e fenomeno di cheap labor y pa duna nos hendenan local miho oportunidad di trabou (eliminando competencia inhusto), UPP kier a extende e ley di minimumloon cu un minimumloon pa diferente categoria di trabou.

Maneho di Admision

UN MANEHO PA PROTEHA NOS MERCADO LABORAL

UPP ta convenci cu cuatro (4) añ a valioso a bay perdi, sin cu riba e tereno di admision tabata tin un maneho efectivo y dirigi riba proteccion real di nos yuinan di tera riba e mercado laboral. Nos por a mira p.e. e fenomeno di cheap labor cu ta keda afecta nos mercado laboral. Tambe nos por mira e maneho di frontera habri cu a percura pa hendenan di otro nacionnan drenta Aruba y traha na Aruba, sin a cumpli cu nos leyman di admision, leyman laboral y leyman di impuesto. Nos por mira e fenomeno di “turistanan di 6 luna”, ora ministro di DIMAS ta acorda pa prolongacion di estadia aki, mientras cu a haya hopi di nan ta trahando riba nos isla. Nos por a mira un Parlamento, cu ta aproba un contrato cu CITGO y PDVSA, unda no ta tene cuenta cu nos propio yuinan di tera. Nos por mira hasta un ministro cu contra maneho y contra ley a duna “ontheffingnan” pa hendenan di afo haya permiso pa traha, mientras cu tin hende local pa cubri e puestonan ey. Tumando tur esaki na consideracion, UPP ta kere cu a papia hopi caba. Nos como pais tin di reconoce cu Aruba ta full y no tin espacio pa laga mas hende drenta Aruba na forma irresponsabel, cu tur su consecuecianan ya menciona y tambe pa nos idioma y cultura. Ta tempo pa nos cuminsa pensa riba nos mes prome, y realmente reconoce cu nos capacidad di carga ya pa hopi tempo a yega su limite.

Manera anticipa caba ta necesario pa den un maneho di proteccion laboral tin un maneho di admision cu no ta perhudica e mercado laboral local. P’ese y ta mas cu imperativo cu regla y leyman riba e tereno aki ta



haya su atencion necesario, pa di e manera ey e por sirbi tambe na duna nos empleadonan local e proteccion necesario.

Door di e problema di ilegalidad y awor cu e porta ta mas hanchu habri cu nunca, hopi di nos hendenan local (Arubiano y esnan cu permiso largo pa keda Aruba) no ta haya e trabou cu nan kier of cu nan tin mester. Tambe esnan cu ta termina nan estudio aki na Aruba, no ta haya cupo den e proceso laboral, door cu dunadonan di trabou ta prefera di busca trahadonan (mayoria hustamente den e edad di 25 pa 40 añ a) di pafo. Esaki tin como consecuencia tambe cu esnan cu no tin trabou ta hayanan obliga pa busca ayudo social, costando Gobierno, e Pueblo di Aruba mas placa.

Na momento cu UPP bai forma parti di un gobierno nobo pa pais Aruba, lo pone un paro temporal di inmediato den dunamento di permiso di

estadia, admision y di permanencia na Aruba. Lo laga un comision di hende serio haci un inventarisacion di e funccionnan cu trahadonan local sin trabou por eherce y cuminsa cu match real pa nos trahadonan local y di esnan cu tin mas cu 10 añ alegalmente na Aruba.

Loke ta concerni permisonan cu a wordo duna contra e ley di LTU, cu na e momentonan aki ta vigente, lo “trek in” e permisonan aki. Esakinan ta conta pa tur esnan cu ultimo tempo a drenta ilegal y/of a haya un “ontheffing” na un manera ilegal pa traha.

Alabes e maneho cu ya despues di 3 añ a no mester “toets” riba e mercado laboral ta wordo inmediatamente “ingetrokken” tambe y ta bai back loke semper ta vigente esta 10 añ a y ta conta pa tur esnan cu tin mester di un permiso segun nos LTU. E ley di LTU (di admision y di expulsion) nobo cu tin actualmente na Parlamento, manera formula, no ta conta cu e sosten di UPP.

Inventarisacion

Mirando cu e situacion economico actual di nos isla, ta haci mas cu imperativo cu nos fronteranan mester wordo controla y e politica di porta habri mester wordo elimina. Tambe dunamento sin mas di permiso na personanan di afor bin traha na Aruba mester wordo para, mientras cu ta institui un grupo di trabou cu lo mester bai haci un inventarisacion di e funcionnan cu tin disponibel na Aruba y tambe di esnan desemplea. For di e database cu ta wordo crea lo mester match esnan cu ta desemplea cu e vacaturanan cu tin habri. Tambe lo bini cu crash-courses den caso cu tin funcionnan cu no por wordo cubri debi na e aspecto di experticio. Pensamento di UPP ta cu e gran mayoria di trahadonan di exterior no ta bin aki pa trabounan cu ta exige conocimiento, pues nos no tin un “kennismigratie” pa Aruba. Mayoria di trabounan ta trabou cu esnan desemplea tambe lo por haci. Pues e ponencia cu despues di tres aña no por termina e permiso di trabou y estadia, pasobra a inverti den e persona su conocimiento y experticio, no ta cuadra cu e realidad den mayoria di casonan. UPP ta kere cu si e dunadornan di trabou kier hisa calidad di nan empleadonan, nan lo mester inverti den esnan cu ta aki caba. Naturalmente lo tin areanan di excepcion cu por wordo haci debi hustamente na experticio cu ta wordo rekeri, pero cu no tin na Aruba. Di otro banda e maneho economico mester ta dirigi riba inversionnan den otro sectornan cu no ta labor intensivo, pues cu mester hopi trahador y “low skilled”, manera ta e caso cu proyectonan hotelero. Aruba mester percura pa un shift den nos economia, unda cu proyectonan ta mas capital intensivo, menos mano di obra, pero si di nivel educacional halto y bon paga.

Exigencianan pa permiso

Pa e aspecto laboral, y tambe pa e aspecto di capacidad di carga, ta necesario pa bin cu e modelo Suiso di nobo pa asina controla y proteha nos mercado laboral y nos comunidad. Bou di e modelo Suiso nos ta

compronde un sistema na unda cu tur trahado nobo di extranheria, por haya un prome permiso pa 3 aña maximalmente. Despues di esaki lo e tin di bandona Aruba y por bin bek como trahado despues di 3 aña. Na momento cu ta bai over pa prolonga permiso, cu ta bai te maximo 3 aña, lo exige tambe cu un test di conocimiento di Papiamento, nos historia y nos cultura ta wordo haci. UPP ta kere firmemente cu un sistema manera tabata existi prome cu 2010, esta esun estilo Suiso mester wordo re-introduci, cu e meta pa proteha nos mercado laboral, particularmente den e temponan dificil aki.

Asina UPP ta kere cu den e proceso di dunamento di permiso, na momento cu esaki ta un necesidad, mester haci tambe testnan medico di malesanan cronico y contagioso pa asina por haya permiso pa keda Aruba. Esaki pa evita cu e ta trece mas gasto y presion riba nos sistema social di e.o. AZV. Na e momentonan aki no tin ningun test medico ta tuma luga.

Na mesun momento mester tin un proceso rigido di “screening” di esnan cu ta drenta. E ultimo añanan esaki no ta wordo efectua mas, cu tur e consecuencianan cu esaki ta trece pa nos seguridad. E aumento di criminalidad di e ultimo tempo no ta wordo causa solamente pa e situacion socio-economico local, sino tambe door di e politica di porta habri, sin e “screening” necesario riba “background” criminal di esnan cu ta drenta.

Bringa ilegalidad

Mester bringa ilegalidad pa evita cu esnan ilegal ta usurpa puestonan di trabou di nos localnan. Mester boet doñonan di trabou segun e leyman existente sin excepcion, y laga nan tambe para responsabel pa tur e gastonan manera di detencion y di biahe pa nan pais di procedencia. E boetnan aki mester wordo aumenta substancialmente. Mester boet tambe esnan cu ta verhuur cas y apartamentonan na ilegalnan, manera ley ya ta prescribi.



Den e parti di control aki, UPP ta kere cu e instancia “Warda nos Costa” lo mester haya un rol importante. Pues lo mester pone e departamento aki, cu na e momentonan aki no por funciona manera mester ta, funciona manera debe ser.

Hunto cu Douane, Guarda Costa, Cuerpo Policial, CEA, Inmigracion, Warda nos Costa mester percura pa proteccion di nos frontera, sigur pa loke ta trata entrada ilegal na nos isla.

UPP kier enfatisa aki cu su maneho di admision lo ta na bienestar di Aruba y e pueblo, tanto pa esnan cu a nace aki y tin raiznan di generacionnan, como tambe pa esnan no naci aki na Aruba, pero cu a scohe Aruba como nan hogar pa biba y traha. E maneho cu UPP ta propone ta un maneho ‘tough but fair’.



Integracion

RESPET MUTUO, CU CULTURA DI ARUBA CENTRAL

Den e cuadro di integracion di tur esnan cu ta biba riba e baranca aki, ta importante pa e maneho di integracion realmente bira e herment pa unifica e pueblo aki. Integracion no ta nifica pa UPP djis tolera e comunidadnan nobo cu a bin establece nan mes na Aruba. Si nos kier papia di un integracion real, esaki mester basa riba respet mutuo pa cada

ken su cultura. Nos como Arubiano mester acepta y reconoce cu nos tin ciudadanonan nobo cu ta stima e pais y ta decidido pa duna un aporte na Aruba. Mientras nos ciudadanonan nobo tambe mester acepta cu nan tin di mira nos cultura, nos norma- y balornan, nos idioma Papiamentu como e forsa catalisado pa asina ey integracion por tuma lugar.

Un sociedad multi-cultural manera ta wordo papia di dje te cu awor, practicamente ta destina pa fracasa, manera ta e caso na Hulanda, na momento cu ta tolera unicamente diferente cultura biba banda di otro, mientras cu no tin intercambio entre e culturanan. Ni tampoco e aceptacion di un pa cu e otro.

Aruba ta un pais cu den trayectoria di su historia a conoce diferente periodonan y fluho di inmigracion. Cada periodo, nos ta consciente di dje, ta yuda forma nos cultura. Esey sigur ta un hecho, pero tambe diferente di e migrantenan ey, cu tempo tambe a adapta na nos cultura y sistema di biba. E problema grandi cu nos a bin ta enfrentando ta, cu den e ultimo 2 decadanan e fluho di inmigrantenan ta mucho grandi y sin control. Esaki no unicamente ta crea cierto inquietudnan bou di nos hendenan, pero tambe ta transforma nos Aruba.

Den e gobernacion di 2009 – 2013, intencion di gobierno tabata pa bin cu cambio den e ley di Admision y Expulsion (LTU). Segun e pensamiento di gobierno cu pa un miho integracion di inmigrantenan na Aruba ta necesario cu e maneho di admision (LTU) wordo liberalisa y ta mas flexible, esta laga mas hende drenta for di exterior. Realidad ta cu hustamente lagando mas hende drenta, particularmente den un periodo di recesion economico, no ta yuda na contribui na integracion. Hustamente den un periodo dificil asina mester a dirigi tur esfuerzo pa den un ambiente di solidarismo traha na integracion berdadero di nos



comunidad. UPP ta kere cu integracion ta posibel pero pa medio di nos enseñanza, informacion, actividad- y intercambianan cultural. Ta importante pa stimula union y solidarismo bou tur nos hendenan, cu locual nos kiermen tur hende, cual sea nan origin y cultura, pa medio di integracion real, saliendo for di cultura y tradicion, idioma Papiamentu, norma- y balornan di Aruba. Naturalmente respetando e ekipahe cultural cu cada un di nos Arubianonan nobo a bin cu ne! Y esaki no por ta "vrijblijvend" pero mester ta un requisito pa por haya un permiso y despues un posibel prologacion di maximo 3 permiso!

Dor di maneho aki nos a crea un sociedad di "NOS" y "NAN"! UPP ta kere cu un maneho pa crea un sociedad "uni-cultural" cu posibilidad di interculturalidad lo caba e segregacion aki y nos lo crea e sociedad di un Aruba uni, pues un sociedad di "NOS".

“UPP ta kere cu e asunto di inmigracion mester wordo regla debidamente. Tin partido cu no kier regl’e paso e ora ey, cada eleccion nan por busca voto cerca esnan cu nan ta segregando. E solucion ta INTEGRACION!!! No ta esey a haci Aruba special? Nos no ta special paso nos ta di mesun rasa of etnicidad. Nos ta special pasobra nos ta uni cu otro door cu nos tin norma- y balornan comun. Y tambe paso e “FAMIA” ta e instituto mas importante den nos sociedad! Y cu “DIOS TODOPODEROSO” ta e fuente di unda nos ta saca tur esaki!”




Educacion

UPGRADE NOS SISTEMA EDUCACIONAL

Un di e instrumentonan mas importante pa garantiza desaroyo y progreso duradero ta enseñanza. Por medio di enseñanza por crea un sociedad cu ta crea oportunidad igual pa tur nos ciudadanonan. UPP ta mira enseñanza como un parti integral di tur desaroyo di un comunidad. Educacion ta cuminsa desde nos nacemento y ta sigui te dia cu Dios yama nos for di e mundo aki. Educacion en general ta algo cu mayornan, famianan, barionan, gobierno, clubnan, maestronan, tur tin di haber cu ne. Pues manera bisa ta algo integral na unda cu tur dia, tur tempo, henter un comunidad ta ocupa cu ne.

P’esey UPP ta kere cu educacion ta algo di nos tur y cu nos tur mester para pa dun’e e contenido cu nos mester pa garantiza un desaroyo duradero.

E inversion den enseñanza bo no ta wak mesora, pero hopi mas despues!



Tur esaki ta partinan di loke nos ta mira como educacion. Tur e tiponan di educacion, mescos cu esun cu nos ta haya na cas, ta loke ta forma e Arubiano. Un hende tin e capacidad pa desaroya su mes, basta e haya e estimulo adecuado y e condicionnan pa haci esaki. P’esey mester crea e condicionnan optimal pa logra cu e individuo ta yega na su maximo potencial.

UPP ta di opinion cu ta momento pa como sociedad nos para keto un rato na nos sistema educacional y wak si esaki a sirbi y con el a sirbi nos den e ultimo 25 añanan. Nos tur sa cu varios t'e innovacionnan cu a trata na trece den nos sistema. Pero keto bay nos no ta mira e resultadonan desea den nos enseñanza. Tanto e parti fisico di nos enseñanza como e parti di personal y di contenido ta keda exige atencion. UPP ta kere cu mester promove mas cu ta posibel un sistema di enseñanza cu ta dirigi riba e persona, esta riba e ser humano y su desaroyo integral, ya cu te awor a ofrece enseñanza den un forma dividi den materianan y no ta ser ofreci como un totalidad. Nos no mester di tin un sistema cu ta basa riba balotacion di hende. Nos enseñanza mester bira uno DI INCLUSION Y NO DI EXCLUSION y cu ta dirigi riba e contexto den cual e mucha ta biba na Aruba. Na momento cu enseñanza ta basa riba exclusion nos ta creando un sociedad den desbalance. UPP ta mira enseñanza como un medio pa prepara ciudadano pa un bida como ciudadano y como profesional. P'esey enseñanza mester inclui meta di desaroyo civico, spiritual, personal, cultural, etc. E forma holistico aki di atende cu enseñanza ta necesario si nos kier pa enseñanza ta dirigi riba e ser humano y su desaroyo integral.

Tambe UPP ta na fabor di un sistema educacional cu ta dirigi realmente riba e necesidadnan di nos comunidad, unda cu lo mester dirigi e oferta di enseñanza riba e demanda for di nos comunidad. Adhunto cu esaki mester bay mira mas tambe den direccion di pilarnan economico nobo cu lo ta realisabel na Aruba, y ofrece di e manera ey estudionan cu ta complementa e necesidadnan den e areanan cu Aruba lo mester sigui desaroya. Asina por pensa por ehempel riba tereno di ICT, tecnologianan renovabel, hi-tec etc. Na mes momento no por lubida otro necesidadnan basico den nos comunidad pa hendenan di cierto ofishi cu semper ta keda necesario.

Grupo di trabou

UPP den un proximo gobierno lo propone pa un Grupo di Trabou di expertonan, pa riba un termino cortico haci un analisis di nos sistema

educacional y pa asina bin cu proposicionnan pa cambianan di nos sistema educacional na unda cu esaki ta necesario.

UPP ta kere cu lo mester cuminsa cu un dialogo tocante e meta di scol secundario na Aruba, ya cu den historia di enseñanza e tendencia ta di haci cambio semper na e fundeshi, esta scol basico of scol preparatorio, pa yega asina na un miho acoplacion cu e scol secundario, mientras cu no ta tribi cuestiona si e scol secundario riba su mes ta cumpli cu e metanan cu nos tin of kier tin pa enseñanza. Ta haci cambio na un sistema, lagando e otro casi intacto. Esaki ta conduci cu na luga di trek un liña continuo basa riba meta comun, nos ta traha fragmenta y cu metanan casi contradictorio na otro. Pa logra acoplacion den enseñanza entre e diferente tiponan di scol, lo mester bay fiha e metanan di scol preparatorio te cu universidad, pa crea asina un liña continuo den e curiculo.

Curiculo di nos enseñanza

Den e cuadro di e Grupo di Trabou proponi cu lo mester bay fiha e meta di nos enseñanza y percura pa e acoplacion, lo mester traha tambe den e aspecto aki na ampliacion di nos curiculo como meta pa formacion personal di nos alumno- y studentenan.

Mester bay fiha un curiculo cu ta cuadra cu nos metanan y necesidadnan. P'esey banda di duna nos alumno- y studentenan educacion basico riba materianan cu ta necesario pa nos prepara nos mes pa futuro estudio of preparacionnan, mester bay fiha tambe den nos curiculo e aspecto di Papiamento, nos historia y cultura, educacion tocante nos turismo. Den e cuadro aki mester percura p.e. pa e materia di CKV (Culturele en Kunstzinnige Vorming o sea Formacion Cultural y Artistico) ta wordo incorpora na tur nivel di nos enseñanza.

Tambe mester bay fiha den nos curiculo enseñanza tocante nos constitucion y nos estado di derecho, manera democracia y nos sistema representativo. E ultimo sigur mas dirigi riba nos alumnonan na nivel secundario. Di e manera aki nos ta contribui na ciudadanonan bon informa y bon prepara.



Empowerment Through Education *Living A Dream, Building A Future*

Otro materia cu tambe lo mester haya atencion ta esun di bon ciudadano, esta “Good Citizenship” na unda cu principionan basico di compañerismo, voluntarismo, y norma- y balornan ta wordo treci

dilanti, manera cu nos a bin ta muestra na diferente partinan di loke ta e programa aki. Cu e ultimo nos ta spera di por crea un comunidad mas uni y cooperativo.

Den e cuadro total di e formacion social y personal di nos alumno- y studiantenan, tambe mester crea espacio necesario pa deporte na scol. Den e redefinicion di nos enseñanza ta hopi necesario pa incorpora tambe e aspecto di “naschoolse opvang” y mira te na unda esaki por bira un parti regular di nos enseñanza. UPP ta kere firmemente cu nos enseñanza mester haya un redefinicion completo al estilo di e paisnan Nordico, particularmente esun di Finlandia, cu por sirbi como modelo.

Rol di Papiamento

Como parti di curiculo ta forma parti tambe e idioma cu ta wordo ofreci na scol. A inicia cu implementacion di e modelonan multilingual den dos scol basico na Aruba, caminda Papiamento ta e idioma di instruccion. Ta e derecho di cada mucha cu ta bay scol pa siña lesa y skirbi den su idioma materno y di ey haci e transferencia pa otro idioma manera Hulandes, Ingles y Spaño. Entre tanto nos tin comprendi cu e proyecto di prueba a keda finalisa y cu e resultadonan ta hopi alentador. Ta keda na gobierno awor pa tuma e siguiente decision pa implementacion di e modelo completo te cu e di 6 año y na mes momento introduci esaki na tur scol aki na Aruba. UPP ta mira aki un rol importante pa nos expertonan duna un consejo riba implementacion di esaki. Papiamento mester hunga un rol importante y prominente den nos enseñanza birando asina e idioma di instruccion na scolnan basico,

mientras Hulandes, Ingles y Spaño lo mester wordo duna como idioma cu ta obligatorio (“verplichte vakken”). Hulandes den concepto di UPP ta birando poco poco mas bien un estorbo den educacion di nos yunan ya cu nos ta kere cu Hulandes como idioma di instruccion ta basa riba un sistema colonial cu no ta funciona mas pa nos generacion actual. Hulandes ta un idioma di scol cu no ta biba den comunidad – 6% di nos comunidad tin idioma Hulandes como idioma na cas – y pa e motibo aki mester haya un otro acercamento, esta di un idioma stranhero. Te cu awor ta trata e idioma aki na scol comosifuera e ta idioma materno di nos muchanan cu tur e consecuencianan cu esaki ta trece cu ne. Lo mester enfoca mas riba e lugar di e idioma den nos enseñanza.

Pues den e cuadro aki lo mester bin un evaluacion cual idioma lo ta e miho idioma di instruccion p.e. na nos scolnan secundario. Esaki riba su mes no mester ta un problema considerando cu na Hulanda hopi estudio ta na Ingles. Tambe nos por mira cu poco poco e rol di Hulandes den nos bida diario y cotidiano ta disparciendo y cu Ingles y Spaño ta bira mas importante. Nos por mira esaki ya pa algun decada caba na unda for di un edad hoben, practicamente for di chikito caba (edad peuter), Ingles ta wordo papia. Esaki como parti di e influencia di e medionan televisivo, computer y otro tecnologianan moderno.

Banda di e realidad ariba menciona aki, y den cuadro di e integracion ta necesario pa reconoce e rol di Papiamento den nos sistema educacional. Mientras cu UPP ta kere tambe cu den cuadro di desaroyo intelectual di nos muchanan, ta necesario pa nan siña pensa y comunica den nos idioma como punto di salida pa despues sigui desaroya su mes den otro materianan.



Tambe lo mester mira e posibilidad pa promove Aruba como pais di idioma door di amplia Universidad di Aruba cu un facultad cu ta duna bachelors y master den idioma Papiamentu, Hulandes, Ingles y Spaño. Esaki ta bira necesario si nos kier bay mas den profesionalisacion di maestro riba diferente nivel. Tambe ta bon pa mira e rol cu Instituto Pedagogico Arubano lo por hunga den esaki, particularmente den cuadro di enseñanza di idioma, mirando cu ya caba nan ta dunando esaki na nivel di bachelor. Un cooperacion di e dos institutonan aki sigur ta imperativo den esaki, na unda atencion special por wordo duna na investigacion di promocion di Aruba como pais multilingual, habriendo asina un centro di investigacion dirigi riba idioma/linguistica.

Upgrading di nos sistema educacional

Tur loke cu nos kier cambia o mehora ta depende tambe di kico nos ta haci cu henter nos sistema educacional y esnan cu ta forma parti di dje, esta e maestronan. Den e caso aki ta importante pa tin comunicacion cu e stakeholdernan mas importante, esta e directivanan di scol, maestronan, mayornan y na unda cu por e alumnonan/studiantenan. Asina lo mester tene encuestanan pa haya sa na unda nos sistema educacional tin su fayonan y saca ideanan nobo cu por contribui na mehora esaki. For di un dialogo asina por saca afo e contribucion positivo cu ta sali for di area aki pa asina mehora nos enseñanza.

Hunto cu e cambianan cu ta wordo introduci ta necesario tambe pa bin cu tayernan pa profesionalisa nos maestronan. Particularmente riba e curriculum adicional cu mester bin acerca, manera esun di “Bon Ciudadano”, ta esencial pa nos maestronan haya e preparacionnan necesario. Tambe por pensa riba e parti didactico cu tempo tempo ta bon pa refresca y capacita nos maestronan mas miho ainda. Den combinacion cu esaki mester mira e posibilidad pa bin cu pasantia pa exterior di nos docentenan.

Pa yuda mehora e calidad di enseñanza mester bin tambe cu material di demostracion (“aanschouwingsmateriaal”) pa e materianan cu ta existi esaki. Mester bay na rediseña klasnan pa esakinan ta mas confortabel pa

nos estudiante- y docentenan (miho bankinan, stulnan, bon luz, acceso na internet, medionan digital etc.). Mester pensa tambe riba otro facilidatnan riba tereno di scol, manera biblioteca (digital), lokaal pa computer, espacio cultural-educacional, cantina, auditorio, gymnastieklokaal adecua, y espacio di trabou pa maestronan.



Banda di haci e inversionnan necesario den nos sistema di enseñanza, ta necesario pa bay analisa y mira ki cambianan nos por trece den nos sistema educacional na unda cu e mesun nivel di recursonan por wordo redirigi den un uzo mas efectivo.

Aki nos por pensa riba uzo di tecnologia moderno, manera I-pads, digi bord, tablets etc. y tambe e posibilidad di e-books desaroya na nivel nacional, cu al final lo spaar fondonan, cu por wordo reubica otro caminda den nos enseñanza. Asina por baha e bukinan den forma digital (PDF) di internet. Un opcion ta pa realisa esaki cu sosten di empresanan cu tin experiencia den e ramo aki.

Tur loke cu bin extra na inversion lo mester ta dirigi hustamente na mehora e producto nobo aki. Hopi biaha e miedo pa cambio ta haci cu hopi ta prefera pa scoge pa status quo. Pero den henter mundo ta wordo realisa cu cambianan, sigur den e era nobo di globalisacion y avancenan tecnologico, ta hopi importante. UPP ta kere cu e manera di ofrece enseñanza na e alumno di awendia, mester haci hopi uzo di e

tecnologianan moderno aki. Asina aki tambe nos ta sirbi un di e metanan cu nos ta wak pa enseñanza esta di cuminsa prepara nos studiantenan pa e era moderno di informacion y di tecnologia di informatica, pa asina sirbi tambe den e.o. e aspecto economico.

Gruponan cu necesidad di atencion special

UPP ta di opinion cu e tempo a yega tambe pa den cuadro di e revision di nos enseñanza cu cuenta mester wordo teni cu e diferente gruponan di mucha den nos comunidad cu ta rekeri atencion special, pa asina evita cu despues na un edad mas grandi nan no tin aceptacion e.o. den nos mercado laboral.

Asina nos por menciona esnan cu tin problema dyslectico, mescos tambe esnan autista. Nos gruponan special mester haya e atencion den e revision aki.

Tambe ta importante pa ofrece sosten pa mucha cu problema di comportacion, problema di concentracion, y mescos pa esnan cu tin problema di siñamento. Mester bin un sistema eficiente pa atende e problemanan aki na tempo por medio di profesionalnan cu lo por asisti e alumnonan aki for di tempran. Esaki ta conta tambe pa esnan cu tin problema di actitud of familiar. Di e manera aki nan tambe por ta garantisa di un participacion na nos sistema di enseñanza regular.

E concepto di 'mega scolnan'

Rond mundo a keda demostra cu e concepto di mega-scolnan no a y no ta funciona pa cierto nivelnan di educacion y aki na Aruba esaki no ta un excepcion. Tanto EPB, Colegio Arubano y tambe scolnan basico cu ta keda crece, ta confrontando problemanan grandi. Problemanan no unicamente financiero of di mantencion, sino tambe problemanan social y di conducta. Hopi biaha e grandura di e scol tambe ta determina e resultado y ta percura pa desaroyo y situacionnan no positivo bou di nos hubentud, manera problema di gang, embarazo hubenil, bringamento, tentamento etc., cu no ta fomenta nada bon pa nos comunidad. UPP ta na favor pa revisa e sistema di educacion na unda cu binimento di otro scolnan riba

nivel avanza ta wordo sosteni, manera e caso di un complejo di MAVO/HAVO/VWO na Noord y vecindario.

UPP ta kere cu nos sistema di EPB tambe mester wordo analisa. Mester mira ki cambionan ta necesario pa loke nos ta spera di e tipo di enseñanza aki. Ta momento pa nos re-inventa nos sistema di enseñanza. Mester wak con estructura di EPB ta y cu si e estructura existente ta esun adecua of cu si mester bai den modulanan mas chikito y confortabel, cu ta dirigi riba e necesidad di hobennan y loke e comunidad, particularmente comercio ta pidi.

Instituto di Calidad

Aruba ta pretende di ta un pais di conocimiento y innovacion, y cu hasta den esaki nos por ta un hub entre e tres Mercan y Europa. Den practica esaki lamentablemente ta puro fantasia, pasobra e base di conocimiento y innovacion ta sinta primeramente den e calidad y e excelencia. Net esakinan Aruba NO ta of no tin! NO por tin conocimiento ni innovacion, si e calidad no t'ey mes!

P'ese y mester bin un Instituto di Calidad como parti di Universidad di Aruba. Mester bini un maneho di calidad pa hotel- y restaurantnan, pa inmigracion, airlines, douane, taxinan, watersports, companianan di tour, carrentals, y tiendanan unda doño y personal ta siña conceptonan di servicio, y cu mester haci cu cada turista ta papia cu entusiasmo riba e servicio na Aruba, cu actualmente ta para riba un nivel hopi abao. E Instituto mester carga e responsabilidad pa e promocion completo di calidad na Aruba.

Den fase 2 e Instituto di Calidad mester bay ocupa su mes cu inspeccion y control di hotel- y restaurantnan, otorga strea, pero tambe cu condicionnan di establecimiento na restaurantnan y otro operadornan di empresanan turistico.



Financiamiento di Estudio

UPP ta na fabor pa bin cu mas incentivo pa asina logra haya nos yiunan di tera cu a bay studia den exterior, pa nan bin Aruba y asina yuda construi e pais aki. Asina tambe e iniciativa di ley cu a keda presenta, lo wordo ehecuta. E proposicion di ley aki ta encera cu e interes cu esnan cu a caba di studia y a regresa Aruba, ta paga riba nan fianza, lo ta 100% deducibel for di belasting, mescos cu ta e caso na e momentonan aki cu hipoteca. Tambe lo mester bay na stimula nos mayornan pa cuminsa di tempran cu un sistema di spaar of di seguro pa asina construi un fondo pa estudio di nan yiu. Di e manera aki tambe lo por alivia e gastonan y sigur minimalisa e debe cu ta wordo crea pa estudio despues. Tambe mester bin cu un campaña di informacion unda cu na un forma cla ta splica e studentenan cu ta aplica pa un prestamo di estudio kico ta e condicionnan, pa despues no topa cu sorpresa ora cu nan termina nan estudio.

Den cuadro di un restructuracion di nos enseñanza, ta hopi importante pa reconoce diplomanan di universidad y scolnan acredita den nos region. Na momento cu nos yiunan di tera termina nan preparacion academico, e regreso pa Aruba lo ta hopi mas facil.

Educacion extra-escolar

Un pueblo cu bon educacion ta un pueblo productivo. P'esey UPP lo stimula pa nos hobennan y tambe adultonan cu no a termina un estudio, haya e oportunidad pa por termina esaki. Reglanan estricto mester wordo suavisa pa di e manera ey tur hende cu ta desea esaki, por termina un estudio cu nan a cuminsa. Ya caba tin posibilidadnan cu ta wordo crea p.e. via un avond havo of mavo, pero tambe tin otro tipo di scolnan cu mester crea e posibilidad aki, manera un EPI anochi. Aki ta pensa especificamente

riba esnan cu pa un motibo of otro no a yega di termina nan estudio, mamanan soltera, mayornan hoben, etc. Di e manera aki tambe lo stimula indirectamente e productividad di nos forza laboral.

Otro aspectonan cu ta influencia nos enseñanza

Banda di e puntonan presenta tin otro puntonan di importancia cu no directamente tin di haber cu e sistema di enseñanza riba su mes, pero tin su influencia riba loke ta e resultado di nos sistema educacional. Por menciona e problemanan social cu muchanan ta bin cu ne di cas. Hopi biaha maestronan ta mas ocupa cu e consecuencia di e problemanan aki den klas, envez cu dunamento di e contenido curricular. E problemanan social aki tambe ta influencia e comportacion di alumnonan na scol y den nos comunidad, cu e consecuencia cu despues nan ta bira un problema pa nos comunidad. P'esey lo ta bon pa tin un acoplacion entre programa social y esun di enseñanza. UPP ta mira cu aki tambe lo mester tin un Grupo di Trabou di expertonan cu hunto cu stakeholdernan lo mester haci proposicionnan concreto na gobierno.

Otro aspectonan cu mester di atencion ta e.o. e escases di maestro, e diferencia grandi den prestacion escolar di e mucha homber compara cu mucha muhe, y falta di envolvimento di mayornan den scol. Banda di esaki por menciona e falta di sosten pa investigacion riba tereno di enseñanza unda cu esaki mester wordo carga tambe politicamente. Mescos ta conta pa cambio di idioma den scol, cu mester conta cu sosten di comunidad, un apoyo nacional pa e curiculo nobo (tanto e rol di prensa, politico, mayor, maestro, scol etc. ta importante den esaki).

Transparencia y democratisacion di nos enseñanza

Mescos cu UPP ta kere cu den henter nos sistema di gobernacion nos mester hiba un maneho transparente y basa riba un democracia bibo, UPP ta kere cu tambe den enseñanza mester tene cuenta cu e dos aspectonan aki.

Despues cu ta determina e rol di cada un di actornan den nos enseñanza, ta necesario pa tin transparencia y participacion di y den decisionnan importante den nos enseñanza. Transparencia di un banda pa loke ta e ministerio di enseñanza, e direccion di enseñanza, e directiva di scolnan y

e cabesante di scolnan. Di e forma ey mayornan ta na altura y por comprende cierto decisionnan y mas ainda kico ta pasa cu e contenido di enseñanza aki na Aruba y principalmente cu desaroyo di nan yiunan. Democratisacion den enseñanza no ta unicamente na duna oportunidad na tur nos yiunan e oportunidad di sigui un educacion, sino cu mayornan y maestronan ta participa den decisionnan di importancia sea ta nival di scol of na nivel di enseñanza en general. Comision di Mayornan no tey solamente pa recauda fondo, sino pa ta participe den decisionnan importante ora ta trata educacion di nan yiunan.

Financiamiento di desaroyo di enseñanza

Manera UPP ya pa e ultimo añanan a bin ta vocifera, UPP ta na fabor pa bini cu un Fondo Nacional di Desaroyo di Enseñanza, na unda cu por medio di nos constitucion esaki ta wordo enforza. E intencion di esaki ta cu por medio di ley ta destina tur eventual entrada for di exploracion y explotacion di rikezanan natural y tambe di huurmento di utilidadnan y patrimonionan nacional pa esaki wordo uza na desaroyo general di nos enseñanza. Enseñanza mester wordo reconoci como un derecho inalienabel y cu mester haya e recursonan necesario pa asina educa y prepara nos hobennan, sin cu lo tin aspectonan di gastonan cu ne. Manera ta e caso di e modelo Finlandia, UPP ta convenci cu educacion ta e motor den desaroyo di nos pais. Un enseñanza basa riba oportunidadnan igual irespeto bo clase social. Den e cuadro aki tambe UPP ta kere cu nos enseñanza preparatorio y basico mester ta gratis, mientras cu pa yiunan di ciudadanonan cu tin entrada abou, pa loke ta trata enseñanza secundario y avanza tambe mester ta gratis. Tur esaki na caminda pa e ehecucion di un Fondo Nacional pa Enseñanza. Al final UPP su vision ta cu henter nos enseñanza mester ta uno gratis y cu e gastonan adicional y inversion den innovacion lo mester wordo cubri pa e Fondo Nacional.

“Nos cada un tin un rol di hunga den educacion di nos yiunan.”

Cultura

NOS CULTURA, NOS NORMA- Y BALORNAN

Pa UPP e ser humano ta central. Pa fortaleza nos nacion, ta necesario cu nos hendenan siña biba armoniosamente cu otro a base di respet mutuo, logrando asina e solidaridad entre nos hendenan y e comunidad den su totalidad. E situacion cu nos pais ta aden ta exige atencion pa evita cu poco poco nos ta cay den un decadencia moral y spiritual total. UPP sigur ta kere cu ta tempo pa percura pa pone e cultura di nos pais na prome lugar. Nos cultura, nos norma- y balornan, nos idioma Papiamentu ta e forsa catalisado di nos Patria, pa tur esnan cu ta biba riba Aruba, sin distincion alguno.

Cultura y integracion sigur ta aspectonan intangible, pero cu ta necesario pa nos enfoca riba nan si di berdad nos kier haci nos pais un fabor di crea un nacion uni y patriotico y cu por hiba nos na e progreso cu nos ta desea pa tur hende cu ta stima y biba riba nos baranca.



Cu proyecto “Nos Patria” nos kier haci di nos Aruba no simplemente un pais, sino un patria cu nos tur cu ta biba riba dje ta stima mescos cu un hogar. “Nos Pais” ta termino material, organisatorio y legal, mientras “Nos Patria” mester ta sentimento y amor cu ta biba paden di e fronteranan y den nos curazon.

Re-activa nos balornan

Den e ultimo decadanan hopi influencianan a hiba nos comunidad, particularmente e individuo, na pensa mas riba su mes cu riba e colectividad. Nos por menciona e desaroyo socio-economico unda cu

placa a bira importante pa por sobrevivir, y tambe e falta di e cuadro di integracion pa inmigrantenan por bira parti di nos comunidad. Balornan social di nos comunidad, cu kizas lo no bin bek den e forma cu e tabata, pero sigur ta balor importante y na bienestar di e comunidad, cu mester wordo re-activa. Nos mester pensa aki riba nos scolnan, nos centronan di bario, nos organisacionnan social dirigi riba yuda hende. UPP ta kere cu e aspecto di “voluntarismo” mester wordo re-carga bou nos hendenan. Nos comunidad door di tempo sigur tabata dota cu e balor importante aki di “voluntarismo”. Bida nobo mester wordo treci den esaki. Di e manera aki nos ta contribui tambe na e idea di “Good Citizenship”.

Maneho Cultural

E maneho cultural di Aruba mester ta basa riba promocion di cultura di Aruba den tur sentido di palabra, pa por cumpli cu idea di *nation building*. Esaki mester ta na nivel gubernamental como instrumento pa yuda tur esnan cu ta ocupa nan mes cu esaki riba e otro terenonan.

UPP ta partidario pa banda di Papiamento, cultura bira parti di nos curiculo ya caba for di nivel basico di nos enseñanza.

Conocemento di nos cultura mester wordo inculca for di edad hoben. Esaki ta e garantia cu nos por yega un dia tambe na integracion.

Tambe expresionnan cultural existente mester haya mas atencion y sosten for di gobierno. Asina nos por menciona p.e. Dande y San Juan. Tambe lo evalua e re-institucion di un instituto cultural manera Fundacion Desaroyo Educativo y Comunitario (FDEC) pa asina sigui trece cultura mas cerca di particularmente nos hobennan. Otro instituto- y organisacionnan mester haya e sosten necesario pa por contribui na

realisacion di e meta pa proteha y promove nos cultura, tanto esun tangibel como esun intangibel.

Asina tambe nos ta kere cu parti di nos tradicionnan inmaterial, manera pesca, agricultura y cria lo mester wordo stimula. Na su turno esaki lo por tin efecto riba area productivo economico y alimenticio di nos pueblo. Importante tambe ta cu den e cuadro aki mas investigacion mester wordo haci riba nos cultura, historia y custumbenan. Conocemento sigur ta di importancia pa loke ta concerni e proceso di integracion y creacion di un nacion cu curazon, esta un Patria.

Instancianan gubernamental cu tin di haber cu cultura y historia di nos

pais mester haya e atencion y sosten necesario pa por cumpli cu nan metanan. Fortificacion di nos cultura ta bai man den man cu e fortificacion di nos institutonan. Entre otro nos por pensa aki na servicionan gubernalman manera Biblioteca Nacional (Arubiana), Archivo Nacional, Departamento di Cultura y nos museonan nacional.

Banda di e parti inmaterial atencion lo wordo duna tambe na e parti material di nos herencia cultural. Di e manera aki ta conserva tanto e memoria y parti di antaño como muestra di nos existencia

den e mundo aki.

Rol di Papiamento den e proceso di “nation building”

Despues di casi 15 aña di oficialisacion di nos Papiamento, nos por bisa cu apenas e trabou mes a cuminsa pa duna nos lenga Papiamento e lugar cu e merece den nos comunidad y den nos bida diario. UPP desde 2013 a muestra den su programa electoral cu Papiamento lo mester hunga un rol central y catalisador pa loke ta trata e proceso di integracion aki na Aruba,



di tur esnan cu a scohe Aruba como nan lugar di bida. Tambe UPP a muestra cu den e cuadro aki, ta importante cu Papiamento ta bay scol. Den cuadro di desaroyo intelectual di nos muchanan, ta necesario pa nan siña pensa y comunica den nos idioma como punto di salida, pa despues sigui desaroya su mes den otro materianan y otro idioma. Di e manera aki nos ta crea tambe e Arubiano critico y cu por expresa su opinion, sin tin nodi laga otronan haci esaki p'e. UPP ta na favor pa no unicamente Papiamento forma parti di nos sistema educacional como idioma di instruccion, pero mester amplia esaki na nivel universitario, pa asina no solamente haci mas investigacion riba nos idioma, sino tambe pa nos por tin e herment necesario pa asina nos por traha na profesionalisacion di nos maestronan. Ta importante pa como gobierno stimula y sostiene mas investigacion científico riba nos dushi Papiamento.



Deporte

PARTICIPACION, CRECEMENTO Y PROFESIONALISMO

Deporte keto bay ta un di e areanan cu nos por bisa ta wordo trata manera un yiu sin mama. Apesar cu nos por bisa cu na varios ocasion nos por mira algun di nos atletanan destaca sea aki na Aruba mes of den exterior, hopi biaha esaki ta bay cu hopi sacrificio. E ultimo aki den sentido cu e sosten pa e deporte y deportista no tey. Mientras cu deporte, mescos den e caso di cultura, ta un motor di unificacion di un pais na

momento cu nos atletanan ta bay representa nos, hopi esfuerzo ta wordo hinca dor di atleta den pecura pa e mes crea su fondonan pa e por participa na competencia y torneonan internacional. Hopi biaha riesgando su propio bida, dor di ta bende rifa etc. riba caya.

Maneho pa deporte, algo esencial

Na prome lugar, nos por constata cu e ultimo año falta di un maneho di deporte na pais Aruba.

Nacionalmente mester bay na determina un vision concreto pa loke ta deporte. E vision aki ta vehiculo cu lo hiba Aruba pa desaroya un maneho riba e tereno aki. Atraves di un plan di mas año lo por bay na fiha tambe e sumanan (fondonan) cu lo ta disponibel pa realiza e vision y metanan. Den e plan di financiamiento aki mester bay mira kico gobierno mes por contribui y kico p.e. un Lotto pa Deporte ta contribui.

Mas atencion pa deporte popular

Pa loke ta deporte, mester elimina e discriminacion actual cu tin riba e tereno aki. Falta di atencion riba e tereno aki ta hopi grandi den e ultimo añanan. Deporte mester haya su lugar merced den nos comunidad. UPP ta kere cu hustamente e deportenan mas practica mester di miho trato. Mester percura pa mas yudansa na ekiponan, y evita cu enbes e hubentud cu ta practica deporte, ta riba caya pa bende rifa, nan mester ta riba campeonan di entrenamiento.



E trato cu deporte ta haya for di gobierno hopi biaha ta e mesun manera cu Comité Olimpico (COA) ta wak e deportenan. Esta deporte cu den nan bista no tin chens riba medaya, no ta wordo yuda.

Gobierno su maneho mester ta uno riba su mes y leu di esun di COA. E relacion di gobierno cu COA ta djis e alocamento di fondonan pa yuda subsidia weganen cu COA ta auspacia. Ganamento di medaya no ta determina adelanto di deporte den bo pais. Adelanto den deporte bo ta midi a base di e grado di participacion y crecimiento di e deporte. Ta importante pa profesionalisa deporte, e deportista y mescos tambe su dirigenten.

Deporte escolar y di barío

Tambe e deporte escolar lo mester haya su atencion bek. Como parti di formacion di nos hubentud, no unicamente loke ta siña den buki ta importante, pero e formacion personal tanto riba tereno di cultura, conocimiento general y deporte tambe ta importante. Deporte escolar mester wordo dirigi di tal manera cu nos ta crea competencia entre scolnan y barionan mes. Di e manera aki bo ta stimula amor pa scol y barío, cu na su turno lo contribui na amor pa pais. Centronan di Barío y otro clubnan deportivo tambe mester haya e atencion necesario unda cu programanan recreativo y deportivo ta wordo brinda na e hubentud pa asina stimula nan participacion na deporte. Nos mester realisa tambe cu deporte, mescos cu arte y musica, ta un forma pa crea oportunidadnan pa nos hobenan na prome lugar por logra realisa un futuro sin criminalidad. Tambe haci deporte ta yuda na evita malesanan cronico manera sobrepeso, diabetes y presion halto. Malesanan cu ta forma awor aki un menasa grandi pa salubridad general di nos pais y cu ta costa hopi placa den tratamiento medico y na unda no ta dedica atencion na prevencion.

“Deporte ta un instrumento hopi importante den desaroyo di un nacion.”

Nos Medio Ambiente y Desaroyo Duradero

HEREDA DI NOS MAYORNAN Y PRESTA FOR DI NOS YIUNAN

Cuido di nos medio ambiente

Nos manera di biba y sistema di consumi mester ta den equilibrio cu nos medio ambiente, mientras cu nos tin di proteha nos recursonan pa evita cu esakinan ta na peliger pa futuro generacionnan. Henter e pensamiento di desaroyo duradero mester ta un pensamiento cu ta wordo carga y practica na tur nivel di nos comunidad, unda cu gobierno ta esun cu ta goberna y planifica. Nos medio ambiente ta importante pa nos mes, e futuro generacionnan, pero tambe pa nos turismo. P’esey ta necesario pa haci un revision di leyman cu ya ta “in place” y otronan cu no tin, cu ta necesario pa introduci. Di e manera aki nos por proteha nos mes di desasternan ecologico causa pa nos accion y cu por wordo evita. Asina nos por menciona un ley cu ta controla importacion di mata, pa evita cu sea malesanan nobo ta wordo introduci of insecto- y bestianan cu despues por bira un plaga pa nos flora y fauna crioyo. Tambe lo mester atende cu otro posibel desasternan manera derame di petroli, tratamiento di sushi, nos industrianan cu tin su efectonan riba nos medio ambiente. Tambe e bida marino mester conoce mas proteccion, particularmente door di e transporte acuatico creciente cu tambe tin su efecto riba bida bou di lama.


Ley di zonaficacion cu proteccion special y control pa cierto areanan

Mester fiha un maneho stringente pa loke ta concerni cierto areanan di nos pais cu mester di e proteccion necesario, unda cu nos como pais tambe lo por cumpli cu nos obligacionnan cu ta resultado di tratadonan internacional. Nos por pensa aki riba sitionan manera e dunanan di Hudishibana (California) y na Boca Prins, cu ta wordo maltrata pa esnan cu

ta bishita esakinan y cu particularmente ta uzanan pa scramble den esakinan.

Tambe nos por pensa na otro areanan, manera ta e caso di Urirama y henter e coridor cu tin parti norte di nos isla. Spaans Lagoen tambe lo mester conoce proteccion real. Asina lo por tin mas sitionan cu mester di e atencion aki, ya cu e sitionan aki por wordo considera como nos patrimonio cultural y nacional.

Den e cuadro aki tambe nos kier menciona e area di Isla di Oro, pa loke UPP ta contra pa esaki bira un area di hotel. UPP ya caba su pensamiento pa loke ta concerni construccion di hotelnan ta conoci, pero e sitio aki mester permanece cu su caracter unico. UPP ta mira mas bien e edificio di



Restaurant Isla di Oro

Isla di Oro mes, wordo restaura, na unda por ubica un museo di nos bida marino eyan, mientras cu e por fungi tambe como un centro di informacion pa turistanan (y tambe alabes como un post di control contra ilegalidad).

Maneho di dump

UPP ta kere cu e situacion di dump na Parkietenbos, despues cu ya caba na 2002 e candela a wordo paga y na 2008 a bin cu e facilidad di procesamiento di sushi, na e momentonan aki ta intolerabel. UPP ta convenci cu den un termino corto por resolve e situacion di dump aki na Aruba, dor di percura pa e planta ya existente wordo poni den funcion

atrobe. Mientras cu e candela existente lo mester wordo paga den corto tempo.

E maneho di desperdicio mester wordo revisa y mester prohibi dumpnan ilegal rond di isla. Esaki pa tene cuenta cu tanto e medio ambiente mes, pero tambe como e habitantenan.

Energia alternativo

UPP ta sostene energia alternativo. Pero e mester ta un maneho responsabel, unda cu mester ta trata di proyectonan realistico, tanto financieramente como tecnicamente. E meta al final ta cu ta trata di bira menos dependiente di petrolio, y na mesun momento contribui na reduccion di emision di carbon den nos atmosfera. Tambe mester ta un maneho cu ta garantisa e suministro di coriente. Tur esaki naturalmente cu no ta kibra nos planta nacional y consecuentemente pone suministro y confiabilidad di energia na peligro. Pues fuentenan di energia alternativo mester bin, pero na un manera responsabel y den balansa cu e red existente. Den e cuadro aki tambe, pa baha emision di carbon, mester sigui sondea e posibilidadnan pa haya suministro di gas natural, pero cu ta pagabel pa ciudadanonan.

UPP, apesar di ta sostene iniciativa alternativo di creacion di energia, ta kere cu esaki lo mester sosode a base di estudionan di factibilidad, mescos tambe di efectonan ambiental y di salud, prome cu tuma e decisionnan concerniente. Den cuadro di esaki tambe, e proyecto Urirama cu cada bes ta lanta cabes, no ta carga e aprobacion di partido UPP.

Famia y Hubentud

DESAROYO INDIVIDUAL BASA RIBA SOLIDARISMO Y COOPERACION

Manera poni den nos puntonan di salida, pa UPP e comunidad ta importante y den esaki e ser humano mester ta central. Aruba no mester ta solamente un cas bunita y luhoso, sino e mester ta un hogar cu ta brinda calor y amor na su ciudadanonan. UPP ta kere den un sociedad cu ta duna oportunidad na e individuo pa e por desaroya su mes, pero basa riba solidarismo y cooperacion.

P'esey UPP ta kere cu e famia, como nucleo di e sociedad mester di e atencion necesario di gobierno. Si nos kier crea un nacion, un pais, cu amor patrio, anto nos lo mester percura pa na nivel micro, nos tin nucleonan familiar basa riba amor hogareño. Pa nos por papia di patria na nivel nacional, nos mester tin hogar na nivel micro. Den un famia uni, nos hubentud, cu ta e futuro di nos pais, lo por experiencia e importancia di un hogar y e importancia di por participa di un forma responsabel na e desaroyo di nos pais.

Formacion pa nos hubentud

UPP ta di opinion cu ta crucial pa inverti den nos hobennan. Ta importante pa bou di nos hubentud den su totalidad oportunidad ta wordo crea pa formacion general, cu lo mester evita cu e hoben lo por wordo influencia pa no sigui e caminda corecto. Na prome luga lo habri e oportunidad, riba tereno di educacion social na EPI pa sigui un preparacion riba gui di hubentud (jongerenwerk). Creacion di mas guia profesional na nivel di Educacion Profesional Intermedio (MBO), lo aumenta e oportunidad pa nos hobennan haya mas guia (profesional) despues di ora di scol.

Tambe lo amplia bou di Departamento di Asuntonan Social, e seccion di guia di hubentud, cu un centro pa hubentud bou guia di algun profesionalnan.

E centro pa hubentud aki, lo mester crea otro lidernan cu lo mester bai guia nos hubentud den e barionan pa medio di centronan den e barionan. Den e centronan den e barionan aki lo mester provee ayudo di huiswerk, deporte, pero tambe otro formanan di recreacion na e hobennan, door di studiantenan di EPI y IPA, como parti di nan stage of afstudeeropdracht. E gastonan di operacion di e centronan aki lo wordo subsidia door di

gobierno, contribucion rasonabel di mayornan y un parti pa e loteria nacional di desaroyo, unda cu educacion tambe lo mester wordo subsidia parcialmente. Lo evalua si scolnan por wordo uza te cu 4'or di atardi unda cu tur klasnan ta cu airco.



Mester introduci un programa di prevencion na scolnan. Muchanan mester wordo conscientisa for di chikito cu nan ta responsabel pa nan propio salud, y tambe muestra nan riba e consecuencianan

di un bida no saludabel. Nos muchanan ta nos futuro, ta p'esey tambe mas atencion mester wordo duna na "Jeugdzorg" y eleva esaki na un nivel mas halto, door di introduci mas campananan di salud na scolnan.

Nos Grandinan

NO TA CUESTION CON BIEU BO TA BIRA, SINO CON BO TA BIRA BIEU!

Hopi ta ser papia riba e problematica di “vergrijzing” di nos comunidad. En corto esaki kiermen cu e composicion di nos sociedad ta mostra cu e cantidad di esnan cu lo bay haci uzo di nos pensioen di AOV, lo ta hopi halto, locual tin como consecuencia cu un presion desbalansa lo ser poni riba e fondo aki. E problema aki lo mester bay ser atendi na un forma responsabel, pa no solamente esnan cu ta gosando di nan AOV awor, ta garantisa cu nan por sigui gosa di dje, pero alabes mester garantisa cu esnan cu awor ta contribui na e fondo, tambe lo por bay gosa di nan pensioen, ora cu nan yega e edad di pensioen.

Hunto cu e gremionan mester bay sinta den e Dialogo Nacional mester yega na pasonan concreto y necesario pa garantisa e ariba menciona. Pa loke ta e discusion di e cambio di edad di pension, UPP ta di acuerdo pa esaki baha, pero si despues di a determina por medio di un estudio, kico ta e situacion real di e fondo di pension di SVB. No sin mas por scohe pa un reduccion di edad, sin sa con e fondo aki lo wordo afecta.

Di otro banda mester percura cu esnan cu ta birando mayor, tambe por biba un bida digno. Hopi biaha nos ta tende cu bida pa esnan di edad un poco halto, tin biaha ya for di 45 aña, ta caro. Si nan mester perde nan trabao, ta dificil pa haya un empleo na nan nivel. Un otro problema cu ta surgi cu mas insistencia ta retiro for di trabou di esnan cu un edad mas halto, pasobra supuestamente nan no ta produci hopi mas.

UPP ta kere cu si ta asina, mester crea e posibilidad pa un “her-/bij-scholing”, pa nan por sigui ta productivo y util den nos desaroyo. Ta p’esey UPP ta kere cu mester bin cu incentivonan fiscal na esnan cu ta duna oportunidad pa e mayornan aki haya e tipo di “scholing” aki.

Mester crea tambe e posibilidad pa esnan cu yega e edad di pensioen, por sigui traha tanten cu nan kier. Mester elimina TUR clase di discriminacion

cu lo por tin relaciona cu edad di un ser humano, na unda tambe lo por introduci incentivonan fiscal.

Mester crea posibilidadnan pa esnan cu yega na un edad avansa, y cu mester di cierto cuido of atencion special, keda biba den nan propio cas, si esaki ta nan deseo. Esaki por ta por medio di subsidio y/o incentivo fiscal den caso cu mester haci cierto adaptacion necesario na nan cas.

Ora cu resulta cu un persona di edad avansa tin e deseo, y mester bay un cas pa nos grandinan, e deseo aki mester por keda cumpli. Lo bay ta necesario pa crea mas alohamento sea na SABA of na casnan particular. Pa por garantisa cu e cuido cu ta ser duna na nos hendenan di edad avansa, ta uno di calidad halto, ta imperativo pa gobierno bin cu reglamentacion y control riba dicho casnan particular.

Meta di e proposicionnan aki ta pa nos grandinan cu tanto a contribui na e desaroyo di nos pais, por hiba e etapa aki di nan bida den un forma digno.



Husticia y Seguridad

PROTEHA NOS ESTADO DI DERECHO

Pa UPP nos estado di derecho ta hopi importante. Ta importante pa nos comunidad kere den nos sistema di derecho, unda cu derecho di tur hende ta wordo respeta y garantisa y e ciudadano tin confianza den nos sistema huridico y hudicial. Ta esencial cu den nos comunidad gobierno mester percura pa seguridad y proteccion di su ciudadanonan.

Tur hende ta igual, y husticia mester wordo aplica a base di igualdad sin excepcion algun, ni di clase ni importancia di funcion. Tambe ta imperativo cu mandatarionan y parlamentarionan na un manera ehemplar ta respeta nos leyman, ya cu ningun hende no por ta para riba leyman.

Prioridad mester wordo poni pa haci cambionan den castigonan, esaki segun categoria y gravedad. Mester bin cu un maneho dirigi y efectivo pa esnan cu ta traspasa leyman penal. Leyman penal riba nan mes tin suficiente, pero na opinion di pueblo hopi biaha e castigonan ta muestra hopi liviano, loke ta haci cu nos ta haya e asina yama “repeat offenders”. UPP ta di opinion cu e aumento di criminalidad di e ultimo tempo no ta wordo causa unicamente door di e situacion socio-economico pero tambe door di e politica di porta habri sin e screening necesario. UPP ta mira tambe cu mester di mas inversion den nos aparato hudicial y nos enseñanza pa asina bringa e situacion di indesea di criminalidad na Aruba.

Ilegalidad y esnan cu ta permiti ilegalidad

Banda di ofrece proteccion na nos trahadonan local, e maneho di admision tambe ta un aspecto importante den preveni y combati ilegalidad. Esnan cu ta emplea trahadonan ilegal lo mester wordo multa conforme nos leyman existente, y tambe obliga nan pa paga gastonan di detencion y di pasashi. E boetnan al respecto lo mester wordo aumenta substancialmente. Pa e doñonan di cas lo crea e instrumentonan necesario pa nan tambe controla si un persona asina ta legal of no. Den e cuadro aki e institutonan manera Polis, Douane, CEA, Inmigracion,

Kustwacht y Warda nos Costa lo haya e espacio necesario pa asina por defende y proteha nos fronteranan.

Un parti di e combatimento di criminalidad sigur ta trata e aspecto di sera nos fronteranan. Esaki pa evita cu



mas y mas ilegalnan ta drenta Aruba. UPP ta propone pa bini cu wachtpost, of toren di vigilancia, particularmente na e sitionan cu ta conoci cu ta trece ilegalnan aden. Den combinacion cu radarnan y tambe uzo di drone, lo por anticipa entrada di ilegalnan y asina evita cu esnan indesea ta drenta Aruba.

Combatimento di criminalidad

Pa por gara criminalnan mas lihe, lo mester percura pa instala camaranan di surveillance den e barionan y e areanan importante di nos pais, cu particularmente ta afecta pa anti-socialnan. Lo mester bin cu castigonan mas severo pa tur actonan criminal, y lo elimina e sistema di “verjaring” pa e crimennan mas severo, p.e. abuso sexual, abuso di menornan of pedofilia.

Nos aparato policial y otro aparatonan di gobierno cu tin un tarea pa cu e seguridad di nos isla, mester haya e atencion necesario y conta cu inversionnan necesario pa asina eherce nan trabou. Tambe lo fomenta e uzo di tip-line unda cu e ciudadano cu ripara algo straño, por haci denuncia adelanta.

Lo mester evalua un sistema di “Watch’i Bario”, cu reglanan cla, na unda cu e gruponan di bario ta wordo forma pa cuida y tira bista den e bario, pa den un forma adelanta autoridad por actua.

Den cuadro di esaki tambe pa UPP ta importante e cooperacion cu companianan di seguridad, ya cu nan tambe mester wordo mira como parti integral di combatimento di criminalidad. Lo mester percura pa e miembronan di compania di seguridad haya e entrenamiento necesario y profesional, mientras cu mester bay na introduci un otro sector den nos sistema di salario minimo pa esnan den e trabou aki, sigur mirando e riesgo cu nan tambe ta core pa nan bida. Mester bin un cooperacion estrecho entre e companianan di seguridad y cuerpo policial (mescos cu entre e diferente cuerponan di sugeridad di pais Aruba).

Mester bin tambe un campaña di informacion na unda cu ta avisa y alerta tur nos ciudadanonan di forma con por proteha su mes.

Den e aspecto aki tambe di combatimento di criminalidad y ilegalidad mester mira te con leu introduccion di un Cuerpo Voluntario cu por asisti polis den su trabounan, cu na cierto momentonan pa suavisa e trabou di Cuerpo Policial y duna espacio pa polis keda enfoca riba combatimento di criminalidad.



Formacion

Mester bin cu programanan social dirigi riba particularmente e hobennan cu ta haya nan involvi cu husticia. Esaki segun UPP mester sosode tanto na nivel di enseñanza y na nivel di Departamento di Asuntonan Social. Den e seccion di Famia y Hubentud lo elabora mas riba e aspectonan aki, no unicamente como medio pa combati criminalidad y fomenta seguridad, sino tambe den su aspecto general di formacion di nos hobennan.

UPP ta kere tambe cu tanto riba tereno di husticia y di enseñanza e inversionnan necesario mester wordo haci, cu na final lo garantiza nos seguridad di un banda, y di otro banda forma ciudadanonan recto den nos comunidad door di un nivel di enseñanza halto y oportunidad pa un trabou decente. Mirando e hecho cu awendia mas ta e mama y tatanan cu tin di traha pareu, UPP ta kere cu lo mester bin cu mas programanan pa por tin mas opvang pa nos hubentud particularmente despues di scol. Esaki lo mester wordo fomenta mas incluyendo tanto scolnan, centronan di barío y departamentonan di gobierno concerni (deporte, enseñanza y cultura).

Instituto Coreccional

Den cuadro di combatimento di criminalidad ta necesario pa bin cu cambionan di maneho y e manera cu castigo ta wordo sinta den KIA. Hopi biaha riba tereno di castigo ta parce cu esakinan ainda ta suave. Mester studia e posibilidad pa esnan cu ta ripiti mesun crimen cada vez, pa laga e personanan aki haci trabounan p.e. di coba canto di caminda, construccion di proyectonan di gobierno, haci canti caminda limpi. Cu esaki ta haci costo di nan permanencia mas abou, y e presonan ta siña tambe pa ta mas involvi den comunidad cargando cierto responsabilidad pa na momento cu nan bolbe den comunidad nan por cuminsa funciona di nobo. Pa esnan cu un miho conducta ta duna oportunidad pa haci cierto tipo di trabou manera drecha y spuit auto (pa priva y gobierno), trabou di carpenteria, etc. Pa KIA por fungi manera un instituto coreccional, lo mester bin un berdadero programa di rehabilitacion, dirigi por medio di counseling y enseñanza. Mester inverti den e werkplaats y garage atrobe, unda presonan lo siña un ofishi, manera traha y drecha meubles, drecha y spuit auto tanto pa Gobierno como pa comunidad. Tambe lo mester mira e posibilidad pa kita nacionalidad Hulandes for di esnan cu den un corto tempo despues cu nan a ricibi esaki, ta actua contra di nos leyman. Esaki naturalmente lo mester wordo trata den relacion cu Reino, mirando cu asuntonan di nacionalidad ta un competencia di Reino, lesa gobierno Hulandes.

Asistencia na victima

Pa promove un sentido di husticia pa e victima di robo of destruccion door di vandalismo, ta propone un ley cu ta responsabilisa esun cu a comete e robo of destruccion pa e gastonan aki. Pues lo haci nan aansprakelijk pa e dañonan financiero. Ora un persona asina wordo sentencia, polis lo manda un schaderapport pa e seccion di Asistencia na Victima y tambe na SIAD, cu lo administra e suma di daño financiero como un debe riba number di e ciudadano cu a comete e robo of destruccion. Na momento cu e persona tin herencia pa haya of cualquier otro pago, notario ta obliga di kita e suma di daño financiero como debe na e

victima, cu lo mester haya e placa aki na su turno. Pa esaki ta necesario cu e victima tin un “vordering” cu no tin “verjaring” den esaki. Di e manera aki tambe por contribui na baha e intencion pa comete atraco of destruccion



Salubridad Publico

NIVEL DI SALUD DI UN PUEBLO TA DETERMINANTE PA E FELICIDAD Y E PRODUCTIVIDAD DI E PUEBLO

Un di e obligacionnan clave cu nos Constitucion ta provee den dje, y cu ta wordo sosteni a base di derecho humano, ta cuidu medico. Di un banda gobierno tin e obligacion di percura pa un cuidu medico adecua, mientras cu di otro banda como ciudadano nos tin derecho riba un cuidu medico di nivel.

Pa nos pais por progresa y desaroya, nos pueblo mester ta saludabel. UPP, como partido social democrata, ta di opinion cu cualkier sorto di diferencia den accesibilidad den nos sistema di cuidu medico mester ser elimina y nos ta para ariba pa nos pueblo hiba un estilo di bida saludabel. Cu introduccion di AZV e diferencia den accesibilidad a wordo elimina. Awor ta na nos mes pa percura pa AZV keda pagabel, sin mishi cu e calidad di nos cuidu medico.

UPP ta consciente cu condicion di salud di nos pueblo ta alarmante, esaki pa un gran parti pa e estilo di bida cu nos ta hibando. Conforme estudionan haci y e cifranan di AZV ta conoci cu e indice di sobrepeso ta hopi halto y e condicionnan relata na esaki manera presion halto, diabetes (sucu), malesa di curason y vena y tambe cancer ta bastante halto. Banda

di cu e enfermedadnan aki ta causa hopi tristesa, e malesanan aki ta haci cu gastonan den salubridad ta subi na un manera astronomico. Mester inversionnan grandi den salubridad pa cumpli cu e meta di tin un pueblo saludabel. Den cuadro di esaki UPP ta propone e siguiente accionnan.

Prevencion!

E unico manera pa frena e cifranan halto di malesanan cronico y tambe cancer ta pa pone mas enfasis riba prevencion. Esaki mester cuminsa for di un edad hoben, esta na scol, unda cu lo involvi p.e. dietistanan, programanan di deporte en general y percura pa fruta y berdura ta accesibel y pagabel. Pa combati e prijsnan halto di fruta y berdura, lo mester stimula binimento di cooperativanan cu ta haci cu e fruta y berduranan por wordo adkeri na un prijs mas rasonabel y stimula produccion di fruta y berdura local.

Drecha maneho di cuidu

Pa henter e cadena di salubridad funciona na un manera responsabel y di calidad halto, mester determina pa medio di un ley formal cu Departamento di Salubridad Publico ta keda encarga di establece un sistema cu continuamente ta monitor, investiga y produci cifranan pa loke ta trata nos estado di salud y ademas ta yuda formula maneho riba tereno di salubridad.

Integra cuidu basico

Mester reforsa y integra cuidu basico riba nivel di bario. Tur e integrantenan (e.o. docter di cas, dietista, educador fisico etc.) ta involvi y ta participa activamente den programanan di prevencion.

Cuidu di emergencia

Esaki mester por wordo duna na tur nivel. Mester educa un gran parti di nos poblacion riba “ Basic Life Support”. Mester haci henter nos isla un “heart save community”. Den e cuadro aki tambe ta na su lugar pa bin un

exigencia, cu mescos un EHBO-kit, tur lugarnan unda cu hende ta frecuente, sea negoshi of departamentonan di gobierno, tin un AED-kit, cu por salba bida di personanan cu haya problema cu curason. E cuidu aki mester ser duna den tur skina na Aruba y den tur hotel, restaurant, etc. Tambe mester sigui inverti den e cuidu di ambulancia, pa laga esaki crece y bira esun mihor di region.

Dr. Horacio E. Oduber Hospitaal (HOH)

Apesar di tur e critica y observacionnan cu UPP a presenta e ultimo añanan, e proceso di renobacion y expansion di HOH a continua su rumbo. Ta conoci cu henter e asunto entorno e proyecto aki NO a bay conforme reglanan di "GOOD GOVERNANCE". Ta p'esey ta imperativo un vigilancia continuo riba eheccion di e proyecto aki.

E proyecto aki lo bai costa alfinal mas di un (1) biyon florin! Pueblo di Aruba mester bay paga un suma di 30 miyon pa aña durante 30 aña. Banda cu mester bin e claridad necesario riba otorgamento y eheccion di e proyecto aki (mirando e cantidad di placa cu e hospital aki ta bay costa nos pueblo), mester monitor henter e desaroyo di nos unico hospital, pa asina garantiza cu e ta keda den man di pueblo. No por permiti cu pa motibo di e costonan halto, e cuidu medico na e hospital bay atras. E inversionnan mester ta dirigi riba e cuidu y ekipo, y no den bloki.

Instituto Medico San Nicolas (IMSAN)

UPP ta kere den un hospital na San Nicolas. No como un capricho politico, pero como algo cu lo beneficia e pueblo di Aruba en general y e pueblo di San Nicolas en particular. Di e manera aki tambe un di dos hospital no solamente lo complementa e necesidad di cuidu medico pa e parti di Aruba aki, pero ta trece tambe un cierto competencia entre e dos hospitalnan, cu al final lo percura pa un mehoracion di nos cuidu medico. Pesey UPP lo percura pa haci IMSAN e facilidad medico manera tabata te intencion for di un principio. Esta un facilidad na unda e cuidu medico specialisa ta basa riba tecnologia avansa y moderno. Den e facilidad aki lo

bay tin 2 camber di operacion, 5 unidad di cuidu intensivo, 6 medium care y 20 cama.

UPP ta insisti riba e idea cu IMSAN mester ta un "one-stop-shop" riba loke ta ser yama cuidu "Cardio-Vascular", cu manera ta conoci ta un problema grandi di salud aki na Aruba. Ta conoci cu tur ekipo (inversion di miyones) pa duna e cuidu aki a wordo deshaci di nan, despues di a laganan para pa



añanan. Esaki UPP ta considera un crimen contra pueblo di Aruba. Pesey lo percura pa tin dos Cat-lab, di cual uno ta mobil. Tambe lo bin cu un servicio di laboratorio, y alabes un servicio di radiologia. Pues un "full fledged medical facility"! Y su tin tur cos cla pa un instituto di oncologia, UPP lo continua cu esaki tambe. UPP lo no bay stop esaki djis pasobra e ta un proyecto di un otro gobierno.

Ley di autopsia

Hopi ta ser comenta riba e hecho cu e cuidu medico en general y den hospital ta laga hopi di desea. Den pasado evaluacionnan a ser haci riba varios specialismo y e conclusion riba cada un di e specialismonan tabata entre otro: "falta di cooperacion" y "overleg" entre specialistanan. No ta exclui e posibilidad cu esaki lo por a conduci na fayecimento di patientnan.

UPP ta kere cu un manera cu lo por promove un cooperacion entre especialista den y pafor HOH ta pa regla legalmente cu autopsia ta wordo haci riba tur fayecido, si no tin ningun obheccion di parti di famia. Y esaki no pa muestra dede riba ningun hende pero pa evita cu hende ta muri pa

motibo di e fayonan aki. Mescos cu e black-box den un avion, UPP ta convenci cu esaki lo conduci na mas cooperacion y "overleg" entre e diferente specialistanan.

Solucion a problema di graduadonan den region

UPP ta consciente di e problematica di nos graduadonan medico den region. Pa basta tempo ta papia riba e asunto aki, pero keto bay parce di no tin solucion. Teniendo na cuenta cu e ley di "uitvoering van de geneeskunst", lo brinda e medico gradua den region e oportunidad di por eherce su funcion. Esaki lo mester sosode pa medio di un examen, sea estilo MIR di Spaña, BIG-toets of e boards di Merca, cu tabata den preparacion na 2009, pero cu a wordo poni un banda. Tambe mester percura pa e mediconan aki haya e oportunidad di sigui specialisa nan mes na hospitalnan renombra den region. Di e manera aki tambe ta duna opotunidad na nos propio yiunan di tera pa bin eherce nan funcion di medico aki na Aruba, cu na su turno por contribui na baha e tempo y lista di espera, cu nos ta experienciando actualmente.

(Re-)capacitacion di nos enfermeronan

UPP ta kere cu ta esencial pa habri oportunidad pa tanto studiantenan di enfermeria of esnan cu ya caba ta traha como enfermero, sigui estudionan avansa y specialisa, na nivel di HBO y WO. Esaki tanto pa upgrade nan mes, y alavez contribui na e calidad di nos cuido di salud publico. Atravez di e capacitacion extra aki, nan por yuda e mediconan cu pashentnan cronico di tal forma cu e medico tin mas tempo pa dedica na e pashentnan nobo of cu pashentnan cu problemanan mas agudo y problematico. Tambe esaki lo por contribui na baha e tempo y lista di espera.

Eliminacion di lista y tempo di espera

Un di e criticanan mas scucha den pueblo ta e lista di espera largo y naturalmente e tempo cu hende tin di warda pa haya atencion medico aki na Aruba. Hunto cu AZV mester bay atende e punto aki, na unda cu di

berda mester yega na un solucion di problema aki. Pesey UPP ta di opinion cu e "beroepsgroepen" no por dicidi over di manpowerplanning. Esaki ta ensera tambe, cu na unda cu ta realmente necesario, mester amplia dokter di cas of specialistanan. Tambe dor di atende cu e aspectonan di nos mediconan cu a studia den region y e (re-)capacitacion di nos enfermeronan, por conduci cu e lista y tempo di espera por wordo baha of elimina. Enefermeronan specialisa mester aki lo por asisti specialistanan den tratamentonan normal of cronico.

Haci un investigacion riba e situacion di y den AZV

Teniendo na cuenta e desaroyonan di ultimo añanan den AZV, ta necesario pa realisa un investigacion riba e situacion di y den AZV. Mester atende cu e controlnan cu ta tumando lugar riba e mundo medico en general y otro proveedornan di cuido, pa wak si no tin "waste" di fondonan, esta gastamento di fondonan cu ta scars. Esaki tambe ta conta pa henter e proceso y procedura di manda hende den exterior, pa asina evita cu por tin negoshi rondo den esaki.



Transporte Publico

UN PLAN NOBO PA ARUBUS

E necesidad pa tin un transporte publico confiabel, accesibel y pagabel ta di suma importancia pa e miles di trahadonan pa yega nan lugar di trabou, mescos cu nos hubentud cu ta bay scol. Banda di esaki nos ta mira

un crecimiento continuo di e cantidad di auto riba nos careteranan, y tambe un presion grandi riba nos medio ambiente pa motibo di e polucion cu ta wordo crea, particularmente pa autonan cu ta den menos bon condicion.

Gobierno ta subsidiando nos compania local, pero indicacion ta cu e gastonan lo sigui subi y e servicio ta bai bira impagabel pa esnan cu salario minimo y e clase trahado cu tin un sueldo menos di 2500 florin pa luna. Un trahado p.e. cu ta biba na San Nicolas ta paga por lo menos 200 florin pa luna pa por yega su trabou na e high-rise hotelnan. E gasto di transportacion aki sigur ta debilita su poder di compra. Propio transportacion no ta un solucion ya cu hopi biaha e grupo di trahadonan aki no ta den posicion pa financia un auto y cumpli cu e gastonan manera di gasolin. Actualmente un persona cu un propio transporte ta paga 400 florin pa luna pa yega pia di trabou. P'esey UPP ta kere cu mester bin un plan pa transporte publico nobo.

Transporte publico gratis

E plan aki ta encera creacion di un fondo di transporte publico, na unda cu tur esnan cu ta traha y dunadornan di trabou lo mester haci un contribucion den esaki. Gobierno di su banda tambe lo cumpli cu su parti den e plan aki cubriendo un parti den esaki for di su medionan general. Arubus di su banda lo sigui maneha su facilidadnan abase di negoshi, pero sin cu medionan for di e fondo di transporte publico aki ta wordo usa p'esakinan. Di e manera aki ta crea e posibilidad pa uzo di transporte publico gratis, pa trahadonan y tur ciudadano inscribi den nos Registro Civil (Censo), uzando nan cedula. Tambe nos hubentud lo haya oportunidad pa uzo di transporte escolar, suavizando asina e gastonan di transporte particularmente pa e famianan di menos recurso. Tambe pa e trahado cu transportacion propio lo sali

beneficia si e tuma transporte publico. Nos otro bishitantenan y servicionan especial di bus lo mester paga pa esakinan.

Ampliacion di rednan den bario y central di busnan

Tambe UPP ta propone pa amplia e red transporte den e barionan, mientras cu pa e distritonan di Noord, Santa Cruz, Paradera y Savaneta lo bini cu centralnan di bus.

Na e diferente sitionan cu ta pone un central di bus, lo crea facilidadnan di parkeo, cu control di security y camera, pa asina duna posibilidad pa mas hende haci uzo e.o. di bus pa bai trabou. Di e forma aki e usuario lo sinti

cu su auto lo ta mas protehi. Tambe lo mira pa bin cu p.e. solar panels na e parkinglotnan aki, pa di e manera aki yuda Arubus financia parti di e gastonan pa loke ta conserni e servicio di Arubus.



Transporte Publico anochi y marduga

UPP ta di opinion cu Arubus mester amplia su servicio cu transporte den oranan di anochi laat pa marduga. Esaki lo ofrece trahadonan cu ta traha e horarionan aki e posibilidad di yega nan trabou, y nan cas, por medio di transporte publico. Ademá esaki tambe lo

forma un alternativo sigur pa esnan cu ta consumi alcohol den oranan laat yega nan destino sin pone nan propio y otro bida na peligro. Esaki por contribui na un trafico mas sigur cu menos morto y herido.

Return on investment

E cambianan aki lo bay conoce resistencia, pero mester mira cu e propuesta aki lo tin otro efectonan positivo. Mas trabou pa chauffeurnan di bus, mientras mas uzo di bus ta nifica menos auto riba caminda, pues

menos congestion den trafico. Tambe por menciona como punto positivo reduccion di polucion, contribuyendo asina na un miho medio ambiente. Na su turno e trahado ta spaar placa di gasoline y ta inverti esaki bek den necesidadnan importante p'e. Di e manera aki e placa gespaar ta dreña bek nos economia.

Parkeermeters

A lanta un Aruparking NV, como un compania yiu di Arubus NV, pa bay maneha na prome instante lotnan di parkeo y parkeermeters den Oranjestad y vecindario. Cu esaki gobierno a pensa di crea fondo pa e compania, cu lo bay pa e Arubus. Di e forma aki gobierno lo a bay ta reduci su aporte (subsidio) na Arubus NV. Contrario na e pensamiento, e parkeermeters a resulta no unicamente den un dolor di cabes pa Arubus y gobierno (ya cu mester a subsidia tambe e compania aki), pero tambe den un debacle pa centro di ciudad y tambe pa e comerciantenan. Contrario na otro gritonan, UPP ta kere cu mester bay na adapta e maneho di parking den Playa. Na prome lugar mester percura pa bin cu sitionan (parkeergarages) unda por para auto. Lo elimina parcialmente e parkeermeterenan, mientras ta laga na cierto sitionan e posibilidad aki di parkeo cerca di e negoshinan na mes. E compania Aruparking lo wordo elimina, mientras cu e trahadornan lo bay forma parti di Departamento di Transporte Publico, como controlador den e area di parkeo. Ya cu sigur a contribui na parkeermento di auto ordena den caya. Pa loke ta Arutram, esaki tambe lo wordo evalua, cu si no ta mas economico pone den man di Arubus directamente.

UNISTA



Aruba Ta Nos Tur!

Union Patriótico Progresista
Aruba | 2017

www.PPA-UPP.com
www.facebook.com/UPPAruba
upp.unista@gmail.com